

大般涅槃经

(三十六卷：第十九卷至第二十一卷)

北凉天竺三藏昙无讖译 梵

宋沙门慧严慧观同谢灵运再治



南無本師釋迦牟尼佛

说明

本简体校正版《大般涅槃经》（南本）电子书，是根据《乾隆大藏经》大乘涅槃部，第 0110 部，北凉天竺三藏昙无讖译梵、宋沙门慧严慧观同谢灵运再治《大般涅槃经》(36 卷)影印本校正的。标点符号仅供参考。

为了便于读诵，本电子书按顺序每三卷合为一册，共十二册。若每天读一册，可十二天读完。

本电子书是免费结缘品。特此说明。

仁慧草堂

二〇一八年十月

目 录

起诵仪	- 1 -
香赞	- 1 -
开经偈	- 1 -
大般涅槃经卷第十九	- 2 -
高贵德王菩萨品第二十二之一	- 2 -
大般涅槃经卷第二十	- 31 -
高贵德王菩萨品第二十二之二	- 31 -
大般涅槃经卷第二十一	- 57 -
高贵德王菩萨品第二十二之三	- 57 -
结诵仪	- 79 -
补阙真言	- 79 -
发愿文	- 79 -
回向偈	- 80 -
回向偈	- 80 -
三皈依	- 81 -

● 起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

大般涅槃经卷第十九

北凉天竺三藏昙无讖译 梵

宋沙门慧严慧观同谢灵运再治

高贵德王菩萨品第二十二之一¹

尔时，世尊告光明遍照高贵德王菩萨摩訶萨言：“善男子，若有菩萨摩訶萨修行如是大涅槃经，得十事功德，不与声闻、辟支佛共，不可思议，闻者惊怪，非内非外，非难非易，非相非非相，非是世法，无有相貌，世间所无。

“何等为十？一者有五。何等为五？一者，所不闻者而能得闻；二者，闻已能为利益；三者，能断疑惑之心；四者，慧心正直无曲；五者，能知如来密藏，是为五事。

“何等不闻而能得闻？所谓甚深微密之义²：一切众生悉有佛性；佛、法、众僧无有差别；三宝性相常、乐、我、净；一切诸佛无有毕竟入涅槃者，常住不³变；如来涅槃非有非无，非有为非无为，非有漏非无漏，非色非不色，非名非不

¹ 大正藏：光明遍照高贵德王菩萨品第二十二之一

² 大正藏：藏

³ 大正藏：无

名，非相非不相，非有非不有，非物非不物，非因非果，非待非不待，非明非暗，非出非不出，非常非不常，非断非不断，非始非终，非过去非未来非现在，非阴非不阴，非入非不入，非界非不界，非十二因缘非不十二因缘，如是等法甚深微密，昔所不闻而能得闻。复有不闻，所谓一切外道经书、四毗陀论、毗伽罗论、卫世师论、迦毗罗论；一切呪术、医方、技⁴艺；日月博食⁵、星宿运变、图书讖记，如是等经，初未曾闻秘密之义，今于此经而得知之。复有十一部经，除毗佛略，亦无如是深密之义，今因此经而得知之。善男子，是名不闻而能得闻。

“闻已利益者。若能听受是大涅槃经，悉能具知一切方等大乘经典甚深义味。譬如男女于明净镜见其色像，了了分明；大涅槃镜亦复如是，菩萨执之，悉得明见大乘经典甚深之义。亦如有人在暗室中，执大炬火，悉见诸物；大涅槃炬亦复如是，菩萨执之，得见大乘深奥之义。亦如日出，有千光明，悉能照了诸山幽暗，令一切人远见诸物；是大涅槃清净慧日亦复如是，照了大乘

⁴ 大正藏：伎

⁵ 大正藏：薄蚀；永乐北藏及龙藏：博食

深邃之处，令二乘人远见佛道。所以者何？以能听受是大涅槃微妙经故。善男子，若有菩萨摩訶萨听受如是大涅槃经，得知一切诸法名字。若能书写、读诵、通利、为他广说、思惟其义，则知一切诸法义理。善男子，其听受者，唯知名字，不知其义；若能书写、受持、读诵、为他广说、思惟其义，则能知义。复次，善男子，听是经者，闻有佛性，未能得见；书写、读诵、为他广说、思惟其义，则得见之。听是经者闻有檀名，未能得见檀波罗蜜；书写、读诵、为他广说、思惟其义，则能得见檀波罗蜜，乃至般若波罗蜜亦复如是。善男子，菩萨摩訶萨若能听是大涅槃经，则知法知义，具二无阂⁶，于诸沙门、婆罗门等，若天、魔、梵，一切世中，得无所畏；开示分别十二部经，演说其义无有差违，不从他闻而能自知近于阿耨多罗三藐三菩提。善男子，是名闻已能为利益。

“断疑心者。疑有二种：一者，疑名；二者，疑义。听是经者，断疑名心；思惟义者，断疑义心。复次，善男子，疑有五种：一者，疑佛定涅槃不？二者，疑佛是常住不？三者，疑佛是真乐

⁶ 大正藏：碍

不？四者，疑佛是真净不？五者，疑佛是真⁷我不？听是经者，疑佛涅槃则得永断；书写、读诵、为他广说、思惟其义，四疑永断。复次，善男子，疑有三种：一，疑声闻为有为无？二，疑缘觉为有为无？三，疑佛乘为有为无？听是经者，如是三疑永灭无余；书写、读诵、为他广说、思惟其义，则能了知一切众生悉有佛性。复次，善男子，若有众生不闻如是大涅槃经，疑心甚多，所谓：若常无常，若乐不乐，若净不净，若我无我，若命非命，若众生非众生，若毕竟不毕竟，若他世若过世，若有若无，若苦若非苦，若集若非集，若道若非道，若灭若非灭，若法若非法，若善若非善，若空若非空。听是经者，如是诸疑，悉得永断。复次，善男子，若有不闻如是经者，复有种种众多疑心，所谓：色是我耶？受、想、行、识是我耶？眼能见耶？我能见耶？乃至识能知耶？我能知耶？色受报耶？我受报耶？乃至识受报耶？我受报耶？色至他世耶？我至他世耶？乃至识亦如是？生死之法有始有终耶？无始无终耶？听是经者，如是等疑，亦得永断。复有人

⁷ 大正藏：实

疑：一阐提⁸犯四重禁、作五逆罪、谤方等经，如是等辈有佛性耶？无佛性耶？听是经者，如是等疑，悉得永断。复有人疑：世间有边耶？世间无边耶？有十方世界耶？无十方世界耶？听是经者，如是等疑，亦得永断。是名能断疑惑之心。

“慧心正直无邪曲者。心若有疑，则所见不正。一切凡夫若不得闻是大涅槃微妙经典，所见邪曲；乃至声闻、辟支佛人所见亦曲。云何名为一切凡夫所见邪曲？于有漏中见常、乐、我、净；于如来所见无常、苦、不净、无我；见有众生寿命知见；计非有想、非无想处以为涅槃；见自在天有八圣道；有见、断见。如是等见，名为邪曲。菩萨摩訶萨若得闻是大涅槃经，修行圣行，则得断除如是邪曲。云何名为声闻、缘觉邪曲见耶⁹？见于菩萨从兜率下，化成¹⁰白象，降神母胎，父名净饭，母名¹¹摩耶，迦毗罗城处胎，满足十月而生；生未至地，帝释捧接，难陀龙王及婆难陀吐水浴之¹²，摩尼跋陀大鬼神王执持宝盖随后侍立，地神化华以承其足，四方各行满足七步，至

⁸ 大正藏：一阐提人；永乐北藏及龙藏：一阐提

⁹ 大正藏：缘觉邪曲见耶；永乐北藏及龙藏：缘觉耶曲见邪；本校勘：缘觉邪曲见耶

¹⁰ 大正藏：乘；永乐北藏及龙藏：成

¹¹ 大正藏：曰

¹² 大正藏：吐水而浴；永乐北藏及龙藏：吐水浴之

¹³于天庙令诸天像悉起承迎；阿私陀仙抱持占相，既占相已生大悲苦，自伤当终不睹佛兴；诣师学书、算计、射御、图讖、技艺；处在深宫，六万嫔女娱乐受乐，出城游观至迦毗罗园，道见老人乃至沙门法服而行，还至宫中见诸嫔女形体状貌犹如枯骨，所有宫殿冢墓无异，厌恶出家；夜半踰城，至郁陀伽、阿罗罗¹⁴等大仙人所，闻说识处及非有想非无想处，既闻是已，谛观是处是非常、苦、不净、无我，舍至树下，具修苦行，满足六年，知是苦行不能得成阿耨多罗三藐三菩提；尔时，复至¹⁵阿夷罗跋提河中洗浴，受牧牛女所奉乳糜¹⁶；受已，转至菩提树下，破魔波旬，得成阿耨多罗三藐三菩提；于波罗奈¹⁷为五比丘初转法轮，乃至于此拘尸城¹⁸入般涅槃。如是等见，是名声闻、缘觉曲见。善男子，菩萨摩訶萨听受如是大涅槃经，悉得断除如是等见。若能书写、读诵、通利、为他演说、思惟其义，则得正直无邪曲见。善男子，菩萨摩訶萨修行如是大涅槃经，谛知菩萨无量劫来不从兜率降神母胎，乃至拘尸

¹³ 大正藏：到

¹⁴ 大正藏：阿罗逻；永乐北藏及龙藏：阿罗罗

¹⁵ 大正藏：到

¹⁶ 大正藏：糜

¹⁷ 大正藏：捺

¹⁸ 大正藏：拘尸那城；永乐北藏及龙藏：拘尸城

城¹⁹入般涅槃，是名菩萨摩訶萨正直之见。

“能知如来深密义者，所谓即是大般涅槃，一切众生悉有佛性，忏四重禁，除谤法心，尽五逆罪，灭一阐提，然后得成阿耨多罗三藐三菩提，是名甚深秘密之义。复次，善男子，云何复名甚深之义？虽知众生实无有我，而于未来不失业果；虽知五阴于此灭尽，善恶之业终不败亡；虽有诸业，不得作者；虽有至处，无有去者；虽有系缚，无受缚者；虽有涅槃，亦无灭者。是名甚深秘密之义。”

尔时，光明遍照高贵德王菩萨摩訶萨白佛言：“世尊！如我解佛所说闻不闻义，是义不然。何以故？法若有者，便应定有；法若无者，便应定无。无，不应生；有，不应灭。如其闻者，是则为闻；若不闻者则为不闻。云何而言闻所不闻？世尊！若不可闻，是为不闻。若已闻者则更不闻。何以故？已得闻故。云何而言闻所不闻？譬如去者，至²⁰则不去，去则不至；亦如生已不生，不生不生；得已不得，不得不得；闻已不闻，不闻不闻亦复如是。世尊！若不闻闻者，一切众生未

¹⁹ 大正藏：拘尸那城；永乐北藏及龙藏：拘尸城

²⁰ 大正藏：到（本卷后同）

有菩提即应有之，未得涅槃亦应得之，未见佛性应见佛性。云何复言十住菩萨虽见佛性未得明了？世尊！若不闻闻者，如来往昔从谁得闻？若言得闻，何故如来于阿含中复言无师？若不闻不闻，如来得成阿耨多罗三藐三菩提者，一切众生不闻不闻亦应得成阿耨多罗三藐三菩提。如来若当不闻如是大涅槃经见佛性者，一切众生不闻是经亦应得见。世尊！凡是色者，或可见²¹，或不可见；声亦如是，或是可闻，或不可闻。是大涅槃非色非声，云何而言可得见闻？世尊！过去已灭则不可闻，未来未至亦不可闻，现在听时则不名闻，闻已声灭更不可闻。是大涅槃亦非过去、未来、现在，若非三世则不可说，若不可说则不可闻。云何而言菩萨修是大涅槃经，闻所不闻？”

尔时，世尊赞光明遍照高贵德王菩萨摩訶萨言：“善哉！善哉！善男子，汝今善知一切诸法如幻、如焰、如乾闥婆城、画水之迹，亦如泡沫、芭蕉之树，空无有实，非命非我，无有苦乐，如十住菩萨之所知见。”

时，大众中忽然之顷有大光明，非青见青，非黄见黄，非赤见赤，非白见白，非色见色，非

²¹ 大正藏：或有可见；永乐北藏及龙藏：或可见

明见明，非见而见。尔时，大众遇斯光已，身心快乐，譬如比丘入师子王定。

尔时，文殊师利菩萨²²白佛言：“世尊！今此光明谁之所放？”

尔时，如来默然不说。

迦叶菩萨复问文殊师利：“何因缘故有此光明照于大众？”

文殊师利默然不答。

尔时，无边身菩萨复问迦叶菩萨：“今此光明谁之所有？”

迦叶菩萨默然不说。

净住王子菩萨复问无边身菩萨：“何因缘故是大众中有此光明？”

无边身菩萨默然不说。

如是五百菩萨皆亦如是，虽相咨问，然无答者。

尔时，世尊问文殊师利²³：“何因缘故²⁴是大众中有此光明？”

文殊师利言：“世尊！如是光明名为智慧，智慧者即是常住，常住之法无有因缘，云何佛问

²² 大正藏：菩萨摩訶萨；永乐北藏及龙藏：菩萨

²³ 大正藏：问文殊师利言；永乐北藏及龙藏：问文殊师利

²⁴ 大正藏：文殊师利，何因缘故；永乐北藏及龙藏：何因缘故

何因缘故有是光明？是光明者名大涅槃，大涅槃者则名常住，常住之法不从因缘，云何佛问何因缘故有是光明？是光明者即是如来，如来者即是常住，常住之法不从因缘，云何如来问于因缘？光明者名大慈大悲，大慈大悲者名为常住，常住之法不从因缘，云何如来问于因缘？光明者即是念佛，念佛者是名常住，常住之法不从因缘，云何如来问于因缘？光明者即是一切声闻、缘觉不共之道，声闻、缘觉不共之道即名常住，常住之法不从因缘，云何如来问于因缘？世尊！亦有因缘，因灭无明，则得炽然阿耨多罗三藐三菩提灯。”

佛言：“文殊师利，汝今莫入诸法甚深第一义谛，应以世谛而解说之。”

文殊师利言：“世尊！于此东方过二十恒河沙等世界，有佛世界名曰不动，其佛住处纵广正等足满一万二千由延²⁵。其地七宝，无有土石，平正柔软，无诸沟坑。其诸树木四宝所成，金、银、琉璃及以玻瓈，华果茂盛无时不有。若有众生闻其华香，身心安乐，譬如比丘入第三禅。周匝复有三千大河，其水微妙，八味具足。若有众生在中浴者，所得喜乐譬如比丘入第二禅。其河

²⁵ 大正藏：旬

多有种种诸华，优钵罗华、波头摩华、拘物头华、分陀利华、香华、大香华、微妙香华、常华、一切众生无遮护华。其河两岸亦有众华，所谓阿提目多伽华、占婆华、波吒罗华、婆师罗华、摩利迦华、大摩利迦华、新摩利迦华、须摩那华、由提迦华、檀窳迦利华、常华、一切众生不²⁶遮护华。底布金沙，有四梯陛，金、银、琉璃、杂色玻瓈。多有众鸟游²⁷集其上²⁸，复有无量虎、狼、师子、诸恶鸟兽，其心相视犹如赤子。彼世界中一切无有犯重禁者、诽谤正法、及一阐提、五逆等罪。其土调适，无有寒热、饥渴苦恼，无贪欲、恚、放逸、嫉妬，无有日月昼夜时节，犹如第二忉利天上。其土人民等有光明，各各无有憍慢之心，一切悉是菩萨大士，皆得神通，具大功德。其心悉皆尊重正法，乘于大乘，爱念大乘，贪乐大乘，护惜大乘，大慧成就，得大总持，心常怜悯一切众生。其佛号曰满月光明如来、应供、正遍知、明行足、善逝、世间解、无上士、调御丈夫、天人师、佛、世尊，随所住处有所讲宣，其土众生无不得闻。为琉璃光菩萨摩訶萨讲宣如是

²⁶ 大正藏：无

²⁷ 大正藏：游

²⁸ 大正藏：中

大涅槃经，言²⁹：‘善男子，菩萨摩訶萨若能修行大涅槃经，所不闻者悉皆³⁰得闻。’彼琉璃光菩萨摩訶萨问满月光明佛，亦如此间光明遍照高贵德王菩萨³¹所问，等无有异。彼满月光明佛即告琉璃光菩萨言：‘善男子，西方去此二十恒河沙佛土，彼有世界名曰娑婆。其土多有山陵、堆阜、土沙、砾石、荆棘³²、恶刺，周遍充满，常有饥渴、寒暑³³苦恼。其土人民不能恭敬沙门、婆罗门、父母、师长，贪著非法，欲于非法，习³⁴行邪法，不信正法，寿命短促，有行奸诈。王者治之，王虽有国不知满足，于他所有生贪利心，兴师相伐，枉死者众。王者习³⁵行如是非法，四天善神心无欢喜，故降灾旱，五谷³⁶不登，人民多病，苦恼无量。彼中有佛号释迦牟尼如来、应供、正遍知、明行足、善逝、世间解、无上士、调御丈夫、天人师、佛、世尊，大悲淳³⁷厚，悯众生故，于拘尸城³⁸娑罗双树间，为诸大众敷演如是

²⁹ 大正藏：佛言；永乐北藏及龙藏：言

³⁰ 大正藏：皆悉；永乐北藏及龙藏：悉皆

³¹ 大正藏：菩萨摩訶萨；永乐北藏及龙藏：菩萨

³² 大正藏：荆棘

³³ 大正藏：热

³⁴ 大正藏：修

³⁵ 大正藏：修

³⁶ 大正藏：谷米；永乐北藏及龙藏：五谷

³⁷ 大正藏：纯

³⁸ 大正藏：拘尸那城；永乐北藏及龙藏：拘尸城

大涅槃经。彼有菩萨名光明遍照高贵德王，已问斯事如汝无异，佛今答之，汝可速往，自当得闻。’世尊！彼琉璃光菩萨闻是事已，与八万四千菩萨摩訶萨欲来至此，故先现瑞。以是因缘有此光明，是名因缘，亦非因缘。”

尔时，琉璃光菩萨与八万四千诸菩萨俱，持诸幡盖、香华、瓔珞、种种妓³⁹乐倍胜于前，俱来至此拘尸城⁴⁰娑罗双树间。以己所持供养之具供养于佛，头面礼足，合掌恭敬，右绕三匝，修敬已毕，却坐一面。

尔时，世尊问彼菩萨：“善男子，汝为至来？为不至来？”

琉璃光菩萨言：“世尊！至亦不来，不至亦不来，我观是义都无有来。世尊！诸行若常，亦复不来；若是无常，亦无有来。若人见有众生性者，有来不来。我今不见众生定性，云何当言有来不来？有憍慢者见有去来；无憍慢者则无去来。有取行者，见有去来；无取行者则无去来。若见如来毕竟涅槃则有去来；不见如来毕竟涅槃则无去来。不闻佛性则有去来；闻佛性者则无去来。

³⁹ 大正藏：伎

⁴⁰ 大正藏：拘尸那城；永乐北藏及龙藏：拘尸城

若见声闻、辟支佛人有涅槃者，则有去来；不见声闻、辟支佛人有涅槃者，则无去来。若见声闻、辟支佛人常、乐、我、净，则有去来；若不见者则无去来。若见如来无常、乐、我、净，则有去来；若见如来常、乐、我、净，则无去来。世尊！且置斯事，欲有所问，唯垂哀悯，少见听许。”

佛言：“善男子，随意所问，今正是时，我当为汝分别解说。所以者何？诸佛难值，如优昙华；法亦如是，难可得闻；十二部中，方等复难。是故，应当专心听受。”

时，琉璃光菩萨摩訶萨既蒙听许，兼被诫勅，即白佛言：“世尊！云何菩萨摩訶萨有能修行大涅槃经闻所不闻？”

尔时，如来赞言：“善哉！善哉！善男子，汝今欲尽如是大乘大涅槃海，正复值我能善解说。汝今所有疑网毒箭，我为大医，能善拔出。汝于佛性犹未明了，我有慧炬，能为照明。汝今欲度⁴¹生死大河，我能为汝作大船师。汝于我所生父母想，我亦于汝生赤子心。汝心今者贪正法宝，值我多有，能相惠施。谛听谛听，善思念之，吾当为汝分别宣释。

⁴¹ 大正藏：渡

“善男子，欲听法者，今正是时。若闻法已，当生敬信，至心听受，恭敬尊重，于正法所莫求其过，莫念贪欲、瞋恚、愚痴，莫观法师种姓好恶。既闻法已，莫生憍慢，莫为恭敬、名誉、利养，当为度世甘露法利。亦莫生念：‘我听法已，先自度身，然后度人；先自解身，然后解人；先自安身，然后安人；先自涅槃，然后令人而得涅槃。’于佛、法、僧应生等想，于生死中生大苦想，于大涅槃应生常、乐、我、净之想。先为他人，然后为身。当为大乘，莫为二乘。于一切法当无所住，亦莫专执一切法相。于诸法中莫生贪想，常生知法见法之想。善男子，汝能如是至心听法，是则名为闻所不闻。”

“善男子，有不闻闻、有不闻不闻、有闻不闻、有闻闻。善男子，如不生生、不生不生、生不生、生生，如不至至、不至不至、至不至、至至。”

“世尊！云何不生生？”

“善男子，安住世谛初出胎时，是名不生生。”

“云何不生不生？”

“善男子，是大涅槃无有生相，是名不生不生。”

“云何生不生？”

“善男子，世谛死时是名生不生。

“云何生生？”

“善男子，一切凡夫是名生生，何以故？生生不断故。一切有漏念念生故，是名生生。四住菩萨名生不生。何以故？生自在故，是名生不生。善男子，是名内法。云何外法？未生生、未生未生、生未生、生生。善男子，譬如种子未生牙时，得四大和合、人功、作业，然后乃生，是名未生生。云何未生未生？譬如败种及未遇缘，如是等辈名未生未生。云何生未生？如芽⁴²生已而未⁴³增长，是名生未生。云何生生？如芽⁴⁴增长。若生不生则无增长。如是，一切有漏是名外法生生。”

琉璃光菩萨摩訶萨白佛言：“世尊！有漏之法若有生者，为是常耶？是无常乎？生若是常，有漏之法则无有生；生若无常，则有漏是常。世尊！若生能自生，生无自性；若能生他，以何因缘不生无漏？世尊！若未生时有生者，云何于今乃名为生？若未生时无生者，何故不说虚空为生？”

⁴² 大正藏：牙

⁴³ 大正藏：不

⁴⁴ 大正藏：牙

佛言：“善哉！善哉！善男子，不生生不可说，生生亦不可说，生不生亦不可说，不生不生亦不可说，生亦不可说，不生亦不可说，有因缘故亦可得说。云何不生生不可说？不生名为生。云何可说？何以故？以其生故。云何生生不可说？生生故生，生生故不生亦不可说。云何生不生不可说？生即名为生，生不自生，故不可说。云何不生不生不可说？不生者名为涅槃，涅槃不生，故不可说。何以故？以修道得故。云何生亦不可说？以生无故。云何不生不可说？以有得故。云何有因缘故亦可得说？十因缘法为生作因，以是义故亦可得说。

“善男子，汝今莫入甚深空定。何以故？大众钝故。善男子，有为之法生亦是常，以住无常，生亦无常；住亦是常，以生生故，住亦无常；异亦是常，以法无常，异亦无常；坏亦是常，以本无今有故，坏亦无常。善男子，以性故，生、住、异、坏皆悉是常，念念灭故，不可说常，是大涅槃能断灭故，故名无常。善男子，有漏之法，未生之时已有生性，故生能生；无漏之法本无生性，是故生不能生。如火有本性遇缘则发；眼有见性，因色、因明、因心故见；众生生法亦复如是，由

本有性，遇业因缘，父母和合，则便有生。”

尔时，琉璃光菩萨⁴⁵及八万四千菩萨摩诃萨闻是法已，踊在虚空高七多罗树，恭敬合掌而白佛言：“世尊！我蒙如来殷懃教诲，因大涅槃始得悟解闻所未⁴⁶闻，亦令八万四千菩萨深解诸法不生等。世尊！我今已解，断诸疑网。然此会中有一菩萨名曰无畏，复欲咨禀，唯垂听许。”

尔时，世尊告无畏菩萨：“善男子，随意问难，吾当为汝分别解说。”

尔时，无畏菩萨与八万四千⁴⁷诸菩萨等，俱从座起，更整衣服，长跪合掌，而白佛言：“世尊！此土众生当造何业而得生彼不动世界？其土菩萨云何而得智慧成就，人中象王有大威德，具修诸行，利智捷疾，闻则能解？”

尔时，世尊即说偈言：

不害众生命 坚持诸禁戒
受佛微妙教 则生不动国
不夺他人财 常施惠一切
造招提僧坊 则生不动国
不犯他妇女 自妻不非时

⁴⁵ 大正藏：菩萨摩诃萨；永乐北藏及龙藏：菩萨

⁴⁶ 大正藏：不

⁴⁷ 大正藏：六万（一本云与八万）四千；永乐北藏及龙藏：八万四千

施持戒卧具 则生不动国
不为自他故 求利及恐怖
慎口不妄语 则生不动国
莫坏善知识 远离恶眷属
口常和合语 则生不动国
如诸菩萨等 常离于恶口
所说人乐闻 则生不动国
乃至于戏笑 不说非时语
谨慎常时语 则生不动国
见他得利养 常生欢喜心
不起嫉妬结 则生不动国
不恼于众生 常生于慈心
不生方便恶 则生不动国
邪见言无施 父母及去来
不起如是见 则生不动国
旷路作好井 种植果⁴⁸树林
常施乞者食 则生不动国
若于佛法僧 供养一香灯
乃至献一华 则生不动国
若为恐怖故 利养及福德
书是经一偈 则生不动国

⁴⁸ 大正藏：殖菜；永乐北藏及龙藏：植果

若为希⁴⁹利福 能于一日中
读诵是经典 则生不动国
若为无上道 一日一夜中
受持八戒斋 则生不动国
不与犯重禁 同共一处住
呵谤方等者 则生不动国
若能施病者 乃至于一果
欢喜而瞻视 则生不动国
不犯僧鬘物 善守佛财供⁵⁰
涂扫佛僧地 则生不动国
造像若佛塔 犹如大拇指
常生欢喜心 则生不动国
若为是经典 自身及财宝
施于说法者 则生不动国
若能听书写 受持及读诵
诸佛秘密藏 则生不动国

尔时，无畏菩萨摩诃萨白佛言：“世尊！我今已知所造业缘得生彼国。是光明遍照高贵德王菩萨摩诃萨普为怜悯一切众生，上⁵¹所咨问。如来若说，则能利益安乐人、天、阿修罗、乾闥婆、

⁴⁹ 大正藏：恹

⁵⁰ 大正藏：善守于佛物；永乐北藏及龙藏：善守佛财供

⁵¹ 大正藏：先

迦楼罗、紧那罗、摩睺罗伽等。”

尔时，世尊即告光明遍照高贵德王菩萨：“善哉！善哉！善男子，汝今于此当至心听，吾当为汝分别解说。有因缘故，未至不至；有因缘故，不至至；有因缘故，至不至；有因缘故，至至。

“何因缘故未至不至？善男子，夫不至者，是大涅槃，凡夫未至，以有贪欲、瞋恚、愚痴故，身业、口业不清净故，及受一切不净物故，犯四重故、谤方等故、一阐提故、五逆罪故。以是义故，未至不至。

“善男子，何因缘故不至至？不至者，名大涅槃。何义故至？永断贪欲、瞋恚、愚痴、身口恶故，不受一切不净物故，不犯四重故，不谤方等经故，不作一阐提故，不作五逆罪故。以是义故，名不至至。须陀洹者，八万劫至；斯陀含者，六万劫至；阿那含者，四万劫至；阿罗汉者，二万劫至；辟支佛者，十千劫至。以是义故，名不至至。

“善男子，何因缘故名至不至？至者，名为二十五有。一切众生常为无量烦恼诸结之所覆蔽，往来不离，犹如轮转，是名为至。声闻、缘觉及诸菩萨已得永离，故名不至；为欲化度诸众生故，

示现在中，亦名为至。

“善男子，何因缘故名为至至？至者即名⁵²二十五有。一切凡夫、须陀洹乃至阿那含，烦恼因缘故，名至至。

“善男子，闻所不闻亦复如是，有不闻闻、有不闻不闻、有闻不闻、有闻闻。

“云何不闻闻？善男子，不闻者，名大涅槃。何故不闻？非有为故，非音声故，不可说故。云何亦闻？得闻名故，所谓常、乐、我、净，以是义故，名不闻闻。”

尔时，光明遍照高贵德王菩萨摩訶萨白佛言：“世尊！如佛所说：‘大涅槃者不可得闻。’云何复言常、乐、我、净而可得闻？何以故？世尊！断烦恼者，名得涅槃；若未断者，名为不得。以是义故，涅槃之性本无今有。若世间法本无今有则名无常。譬如瓶等本无今有，已有还无，故名无常。涅槃若尔，云何说言常、乐、我、净？”

“复次，世尊！凡因庄严而得成者，悉名无常。涅槃若尔，应是无常。何等因缘？所谓三十七品、六波罗蜜、四无量心、观于骨相、阿那波那、六念处、破析六大，如是等法皆是成就涅槃

⁵² 大正藏：是

因缘，故名无常。

“复次，世尊！有名无常。若涅槃是有，亦应无常。如佛昔于阿含中说声闻、缘觉、诸佛世尊皆有涅槃，以是义故，名为无常。

“复次，世尊！可见之法名为无常，如佛先说：‘见涅槃者则得断除一切烦恼。’

“复次，世尊！譬如虚空于诸众生等无障阂⁵³，故名为⁵⁴常。若使涅槃是平⁵⁵等者，何故众生有得、不得？涅槃若尔于诸众生不平等者，则不名常。

“世尊！譬如百人共有一怨，若害此怨则多人受乐。若使涅槃是平等法，一人得时应多人得，一人断结应多人亦断。若不如是，云何名常？譬如有人恭敬、供养、尊重、赞叹国王、王子、父母、师长则得利养，是不名常。涅槃亦尔，不名为常。何以故？如佛昔于阿含经中告阿难言：‘若有人能恭敬涅槃，则得断结，受无量乐。’以是义故，不名为常。世尊！若涅槃中有常、乐、我、净名者，不名为常。如其无者，云何可说？”

尔时，世尊告光明遍照高贵德王菩萨⁵⁶：“涅

⁵³ 大正藏：碍

⁵⁴ 大正藏：无；丽藏：为；永乐北藏及龙藏：无；本校勘：为

⁵⁵ 大正藏：常

⁵⁶ 大正藏：菩萨摩訶萨言；永乐北藏及龙藏：菩萨

槃之体非本无今有。若涅槃体本无今有者，则非无漏常住之法。有佛无佛，性相常住，以诸众生烦恼覆故，不见涅槃便谓为无。菩萨⁵⁷以戒、定、慧勤⁵⁸修其心，断烦恼已便得见之。当知涅槃是常住法，非本无今有，是故为常。善男子，如暗室中井，种种七宝，人亦知有，暗故不见。有智之人，善知方便，然大明灯，持往照燎⁵⁹，悉得见之。是人于此终不生念：‘水及七宝本无今有。’涅槃亦尔，本自有之，非适今也，烦恼暗故，众生不见。大智如来以善方便燃智慧灯，令诸菩萨得见涅槃常、乐、我、净。是故，智者于此涅槃不应说言本无今有。

“善男子，汝言‘因庄严故，得成涅槃应无常’者，是亦不然。何以故？善男子，涅槃之体，非生非出，非实非虚，非作业生，非是有漏有为之法，非闻非见，非堕非死，非别异相亦非同相，非往非还，非去、来、今，非一非多，非长非短，非圆非方，非尖非斜⁶⁰，非相非想⁶¹，非名非色，非因非果，非我我所。以是义故，涅槃是常，恒

⁵⁷ 大正藏：菩萨摩訶萨；永乐北藏及龙藏：菩萨

⁵⁸ 大正藏：熏

⁵⁹ 大正藏：了

⁶⁰ 大正藏：斜；永乐北藏及龙藏：邪

⁶¹ 大正藏：非有相非无相；永乐北藏及龙藏：非相非想

不变易。是以无量阿僧祇劫修习⁶²善法以自庄严，然后乃见。善男子，譬如地下有八味水，一切众生而不能得，有智之人施功穿掘则便得之，涅槃亦尔。譬如盲人不见日月，良医疗之则便得见，而是日月非是今有⁶³；涅槃亦尔，先自有之，非适今也。善男子，如人有罪，系之囹圄，久乃得出，还家得见父母、兄弟、妻子、眷属，涅槃亦尔。

“善男子，汝言‘因缘故，涅槃之法应无常’者，是亦不然。何以故？善男子，因有五种。何等为五？一者，生因；二者，和合因；三者，住因；四者，增长因；五者，远因。云何生因？生因者，即是业烦恼等及外诸草木子，是名生因。云何和合因？如善与善心和合，不善与不善心和合，无记与无记心和合，是名和合因。云何住因？如下有柱，屋则不堕；山、河、树木因大地故，而得住立；内有四大，无量烦恼众生得住，是名住因。云何增长因？因缘、衣服、饮食等故，令众生增长。如外种子，火所不烧，鸟所不食，则得增长；如诸沙门、婆罗门等依因和上善知识等

⁶² 大正藏：集

⁶³ 大正藏：本无今有；永乐北藏及龙藏：今有

而得增长；如因父母，子得增长，是名增长因。云何远因？譬如因呪，鬼不能害，毒不能中；依凭国王，无有盗贼；如牙⁶⁴依因地、水、火、风等；如水钻⁶⁵及人为酥远因；如明色等为识远因；父母遗体⁶⁶为众生远因；如时节等，悉名远因。善男子，涅槃之体非如是等⁶⁷五因所成，云何当言是无常因？

“复次，善男子，复有二因：一者，作因；二者，了因。如陶师轮绳，是名作因；如灯烛等照暗中物，是名了因。善男子，大涅槃者不从作因而有，唯从了因。了因者，所谓三十七助道法、六波罗蜜，是名了因。善男子，布施者是涅槃因，非大涅槃因；檀波罗蜜乃得名为大涅槃因。三十七品是涅槃因，非大涅槃因；无量⁶⁸阿僧祇助菩提法乃得名为大涅槃因。”

尔时，光明遍照高贵德王菩萨摩訶萨白佛言：“世尊！云何布施不得名为檀波罗蜜？云何布施而得名为⁶⁹檀波罗蜜？乃至般若，云何不得名⁷⁰般

⁶⁴ 大正藏：芽

⁶⁵ 大正藏：攢

⁶⁶ 大正藏：精血；永乐北藏及龙藏：遗体

⁶⁷ 大正藏：非是如是；永乐北藏及龙藏：非如是等

⁶⁸ 大正藏：无量无边；永乐北藏及龙藏：无量

⁶⁹ 大正藏：之

⁷⁰ 大正藏：名为；永乐北藏及龙藏：名

若波罗蜜？云何得名⁷¹般若波罗蜜？云何名涅槃？云何名大涅槃？”

佛言：“善男子，菩萨摩訶萨修行方等大般涅槃，不闻布施，不见布施；不闻檀波罗蜜，不见檀波罗蜜；乃至不闻般若，不见般若；不闻般若波罗蜜，不见般若波罗蜜；不闻涅槃，不见涅槃；不闻大涅槃，不见大涅槃。菩萨摩訶萨修大涅槃知见法界，解了实相空无所有，无有和合⁷²觉知之相，得无漏相、无所作相、如幻化相、热时焰⁷³相、乾闥婆城空虚⁷⁴之相。菩萨尔时得如是相，无贪、恚、痴，不闻不见，是名菩萨摩訶萨真实之相、安住实相。菩萨摩訶萨自知此是檀、此是檀波罗蜜，乃至此是般若、此是般若波罗蜜，此是涅槃、此是大涅槃。

“善男子，云何是施非波罗蜜？见有乞者，然后乃与，是名为施，非波罗蜜；若无乞者，开心自施，是则名为檀波罗蜜。若时时施，是名为施，非波罗蜜；若修常施，是则名为檀波罗蜜。若施他已还生悔心，是名为施，非波罗蜜；施已不悔，是则名为檀波罗蜜。菩萨摩訶萨于财物中

⁷¹ 大正藏：名为；永乐北藏及龙藏：名

⁷² 大正藏：合；永乐北藏及龙藏：舍；本校勘：合

⁷³ 大正藏：炎

⁷⁴ 大正藏：虚空；永乐北藏及龙藏：空虚

生四怖心，王、贼、水、火，欢喜施与，是则名为檀波罗蜜。若望报施，是名为施，非波罗蜜；施不望报，是则名为檀波罗蜜。若为恐怖、名闻利养、家法相续、天上五欲，为憍慢故，为胜慢故，为知识故，为来报故，如市易法，善男子，如人种树，为得荫凉，为得华果及以材木；若人修行如是等施，是名为施，非波罗蜜。

“菩萨摩訶萨修行如是大涅槃者，不见施者、受者、财物，不见时节，不见福田及非福田，不见因、不见缘、不见果报，不见作者、不见受者，不见多、不见少，不见净、不见不净，不轻受者、己身、财物，不见见者、不见不见者，不计己他，唯为方等大般涅槃常住法故，修行布施；为利一切诸众生故而行布施；为断一切众生烦恼故，行于布施⁷⁵；为诸众生不见受者、施者、财物故，行于布施⁷⁶。

“善男子，譬如有人堕大海水，抱持死尸则得度脱；菩萨摩訶萨修大涅槃行布施时亦复如是，如彼死尸。善男子，譬如有人闭在深狱，门户坚牢，唯有厕孔，便从中出至无阂⁷⁷处；菩萨摩訶

⁷⁵ 大正藏：行于施；永乐北藏及龙藏：行于布施

⁷⁶ 大正藏：行于施；永乐北藏及龙藏：行于布施

⁷⁷ 大正藏：碍

萨修大涅槃行布施时，亦复如是。善男子，譬如贵人，恐怖急厄，更无恃怙，依旃陀罗；菩萨摩訶萨修大涅槃行于布施，亦复如是。善男子，譬如病人，为除病苦得安乐故，服食不净；菩萨摩訶萨修大涅槃行于布施，亦复如是。善男子，如婆罗门值谷踊⁷⁸贵，为寿命故食啖狗肉；菩萨摩訶萨修大涅槃行于布施，亦复如是。

“善男子，大涅槃中如是之事，从无量劫来不闻而闻，尸罗、尸罗波罗蜜乃至般若、般若波罗蜜，如⁷⁹杂华经中广说。

“善男子，云何菩萨摩訶萨修大涅槃不闻而闻？十二部经其义深邃，昔来不闻，今因是经，得具足闻。先虽得闻，唯闻名字，而今于此大涅槃经，乃得闻义。声闻、缘觉唯闻十二部经名字，不闻其义，今于此经具足得闻，是名不闻而闻。善男子，一切声闻、缘觉经中，不曾闻佛有常、乐、我、净，不毕竟灭；三宝佛性无差别相；犯四重禁⁸⁰、谤方等经、作五逆罪及一阐提悉有佛性。今于此经而得闻之，是名不闻而闻。”

大般涅槃经卷第十九

⁷⁸ 大正藏：勇

⁷⁹ 大正藏：如佛；永乐北藏及龙藏：如

⁸⁰ 大正藏：罪

大般涅槃经卷第二十

北凉天竺三藏昙无讖译 梵

宋沙门慧严慧观同谢灵运再治

高贵德王菩萨品第二十二之二⁸¹

光明遍照⁸²高贵德王菩萨⁸³白佛言：“世尊！若犯重禁、谤方等经、作五逆罪、一阐提等有佛性者，是等云何复堕地狱？世尊！若使是等有佛性者，云何复言无常、乐、我、净？世尊！若断善根名一阐提者，断善根时所有佛性云何不断？佛性若断，云何复言常、乐、我、净？如其不断，何故名为一阐提耶？世尊！犯四重禁，名为不定；谤方等经、作五逆罪及一阐提，悉名不定。如是等辈若决定者，云何得成阿耨多罗三藐三菩提？得⁸⁴须陀洹乃至辟支佛，亦名不定。若须陀洹至辟支佛是决定者，亦不应成阿耨多罗三藐三菩提。世尊！若犯四重不决定者，须陀洹乃至辟支佛亦不决定。如是不定，诸佛如来亦复不定。若佛不定，涅槃体性亦复不定，至一切法亦复不定。云

⁸¹ 大正藏：高贵德王菩萨品之二

⁸² 大正藏：尔时，光明遍照；永乐北藏及龙基：光明遍照

⁸³ 大正藏：菩萨摩訶萨；永乐北藏及龙基：菩萨

⁸⁴ 大正藏：从

何不定？若一阐提除一阐提则成佛道。诸佛如来亦应如是，入涅槃已，亦应还出，不入涅槃。若如是者，涅槃之性则为不定。不决定故，当知无有常、乐、我、净。云何说言一阐提等当得涅槃？”

尔时，世尊告光明遍照高贵德王菩萨⁸⁵言：“善哉！善哉！善男子，为欲利益无量众生令得安乐，怜悯慈念诸世间故，为欲增长发菩提心诸菩萨故，作如是问。

“善男子，汝已亲近过去无量诸佛世尊，于诸佛所种诸善根，久已成就菩提功德，降伏众魔令其退散，已教无量无边众生悉令得至阿耨多罗三藐三菩提，久已通达诸佛如来所有甚深秘密之藏，已问过去无量无边恒河沙等诸佛世尊如是甚深微密之义。我都不见一切世间若人、若天、沙门、婆罗门、若魔、若梵，有能咨问如来是义。今当诚心，谛听！谛听！吾当为汝分别演说。

“善男子，一阐提者，亦不决定。若决定者，是一阐提终不能得阿耨多罗三藐三菩提。以不决定，是故能得。如汝所言‘佛性不断，云何一阐提断善根’者，善男子，善根有二种：一者，内；二者，外。佛性，非内非外，以是义故，佛性不

⁸⁵ 大正藏：菩萨摩訶萨；永乐北藏及龙基：菩萨

断。复有二种：一者，有漏；二者，无漏。佛性，非有漏非无漏，是故不断。复有二种：一者，常；二者，无常。佛性，非常非无常，是故不断。若是断者，则应还得；若不还得，则名不断；若断已得，名一阐提。

“犯四重者亦是不定，若决定者，犯四重禁终不能得阿耨多罗三藐三菩提。谤方等经亦复不定，若决定者，谤正法人终不能得阿耨多罗三藐三菩提。作五逆罪亦复不定，若决定者，五逆之人终不能得阿耨多罗三藐三菩提。色与色相，二俱不定。香、味、触相，生相至无明相、阴入界相、二十五有相，四生乃至一切诸法，皆亦不定。

“善男子，譬如幻师，在大众中化作四兵车、步、象、马，作诸瓔珞严身之具、城邑、聚落、山林、树木、泉池、河井。于⁸⁶彼众中，有诸小儿无有智慧，睹见之时，悉以为实。其中智人，知其虚诞，以幻力故，惑人眼目。善男子，一切凡夫乃至声闻、辟支佛等，于一切法，见有定相亦复如是。诸佛菩萨于一切法不见定相。

“善男子，譬如小儿，于盛夏月见热时焰谓之水。有智之人，于此热焰终不生于实水之想，

⁸⁶ 大正藏：而

但是虚焰，诳人眼目，非实是水。一切凡夫、声闻、缘觉见一切法亦复如是，悉谓是实。诸佛菩萨于一切法不见定相。

“善男子，譬如山礮⁸⁷，因声有响，小儿闻之，谓是实声；有智之人，解无定实，但有声相诳于耳识。善男子，一切凡夫、声闻、缘觉于一切法亦复如是，见有定相。诸菩萨等解了诸法悉无定相，是⁸⁸无常相、空寂等相、无生灭相。以是义故，菩萨⁸⁹见一切法是无常相。

“善男子，亦有定相。云何为定？常、乐、我、净。在何处耶？所谓涅槃。

“善男子，须陀洹果亦复不定，不决定故，经八万劫得阿耨多罗三藐三菩提心；斯陀含果亦复不定，不决定故，经六万劫得阿耨多罗三藐三菩提心；阿那含果亦复不定，不决定故，经四万劫得阿耨多罗三藐三菩提心；阿罗汉果亦复不定，不决定故，经二万劫得阿耨多罗三藐三菩提心；辟支佛道亦复不定，不决定故，经十千劫得阿耨多罗三藐三菩提心。

“善男子，如来今于拘尸城⁹⁰娑罗双树间，

⁸⁷ 大正藏：涧

⁸⁸ 大正藏：见

⁸⁹ 大正藏：菩萨摩訶萨；永乐北藏及龙基：菩萨

⁹⁰ 大正藏：拘尸那城；永乐北藏及龙基：拘尸城

示现倚卧师子之床欲入涅槃，令诸未得阿罗汉果众弟子等及诸力士生大忧苦，亦令天、人、阿修罗、乾闥婆、迦楼罗、紧那罗、摩睺罗伽等大设供养，欲使诸人以千端氎缠裹其身，七宝为棺，盛满香油，积诸香木，以火焚之。唯除二端不可得烧：一者，衬⁹¹身；二者⁹²，最在外。为诸众生分散舍利，以为八分。一切所有声闻弟子咸言：‘如来入于涅槃。’当知如来亦不必⁹³定入于涅槃。何以故？如来常住不变易故。以是义故，如来涅槃亦复不定。

“善男子，当知如来亦复不定。如来非天，何以故？有四种天：一者，世间天；二者，生天；三者，净天；四者，义天。世间天者，如诸国王；生天者，从四天王乃至非有想非无想天；净天者，从须陀洹至辟支佛；义天者，十住菩萨摩訶萨等。以何义故，十住菩萨名为义天？以能善解诸法义故。云何为义？见一切法是空义故。

“善男子，如来非王，亦非四天，乃至非有想非无想天、从须陀洹至辟支佛、十住菩萨。以是义故，如来非天，然诸众生亦复称佛为天中天。

⁹¹ 大正藏：觀身

⁹² 大正藏：二；永乐北藏及龙基：二者

⁹³ 大正藏：毕

是故，如来非天非非天、非人非非人、非鬼非非鬼、非地狱畜生饿鬼非非地狱畜生饿鬼、非众生非非众生、非法非非法、非色非非色、非长非非长、非短非非短、非相非非相、非心非非心、非有漏非无漏、非有为非无为、非常非无常、非幻非非幻、非名非非名、非定非非定、非有非无、非说非非说、非如来非不如来。以是义故，如来不定。

“善男子，何故如来不名世天？世天⁹⁴，即是诸王。如来久于无量劫中已舍王位，是故非王。非非王者，如来生于迦毗罗城净饭王家，是故非非王。

“非生天者，如来久已离诸有故，是故非生天。非非生天，何以故？升兜率天下阎浮提故，是故如来非非生天。

“亦非净天，何以故？如来非是须陀洹乃至非辟支佛，是故如来非是净天。非非净天，何以故？世间八法所不能染，犹如莲华不受尘水，是故如来非非净天。

“亦非义天，何以故？如来非是十住菩萨故，

⁹⁴ 大正藏：世天者；永乐北藏及龙基：世天

是故如来非是义天⁹⁵。非非义天，何以故？如来常修十八空义故，是故如来非非义天。

“如来非人，何以故？如来久于无量劫中离人有故，是故非人。亦非非人，何以故？生于迦毗罗城故，是故非非人。

“如来非鬼，何以故？不害一切众生⁹⁶故，是故非鬼。亦非非鬼，何以故？亦以鬼像化众生故，是故非非鬼。

“如来亦非地狱畜生饿鬼，何以故？如来久离诸恶业故，是故非地狱畜生饿鬼。亦非非地狱畜生饿鬼，何以故？如来亦复现受三恶诸趣之身化众生故，是故非非地狱畜生饿鬼。

“亦非众生，何以故？久已舍⁹⁷离众生性故，是故如来非众生。亦非非众生，何以故？或时演说众生相故，是故如来非非众生。

“如来非法，何以故？诸法各各有别异相，如来不尔，唯有一相，是故非法。亦非非法，何以故？如来法界故，是故非非法。

“如来非色，何以故？十色入所不摄故，是故非色。亦非非色，何以故？身有三十二相、八

⁹⁵ 大正藏：非义天也；永乐北藏及龙基：非是义天

⁹⁶ 大正藏：诸众生；永乐北藏及龙基：众生

⁹⁷ 大正藏：远

十种好故，是故非非色。

“如来非长，何以故？断诸色故，是故非长。亦非非长，何以故？一切世间无有能见顶髻相故，是故非非长。

“如来非短，何以故？久已远离憍慢结故，是故非短。亦非非短，何以故？为瞿师⁹⁸长者示三尺身故，是故非非短。

“如来非相，何以故？久已远离诸相相故，是故非相。亦非非相，何以故？善知诸相故，是故非非相。

“如来非心，何以故？虚空相故，是故非心。亦非非心，何以故？有十力心法故，亦能知他众生心故，是故非非心。

“如来非有为，何以故？常、乐、我、净故，是故非有为。亦非无为，何以故？有来去坐卧，示现涅槃故，是故非无为。

“如来非常，何以故？身有分故，是故非常。云何非常？以有知故。常法无知，犹如虚空；如来有知，是故非常。云何非常？有言说故。常法无言，亦如虚空；如来有言，是故无常。有姓氏故，名曰无常；无姓之法乃名为常。虚空常故，

⁹⁸ 大正藏：瞿师罗；永乐北藏及龙基：瞿师

无有姓氏；如来有姓，姓瞿昙氏，是故无常。有父母故，名曰无常；无父母者，乃名曰常。虚空常故，无有父母；佛有父母，是故无常。有四威仪，名曰无常；无四威仪，乃名曰常。虚空常故，无四威仪；佛有四威仪⁹⁹，是故无常。常住之法无有方所，虚空常故无有方所，如来出在东天竺地，住舍婆提或王舍城，是故无常。以是义故，如来非常。亦非非常，何以故？生永断故。有生之法，名曰无常；无生之法乃名为常。如来无生，是故为常。常法无姓¹⁰⁰，有姓¹⁰¹之法名曰无常。如来无生无姓¹⁰²，无生无姓¹⁰³故常。有常之法遍一切处，犹如虚空，无处不有。如来亦尔，遍一切处，是故为常。无常之法，或言此有，或言彼无。如来不尔，不可说言是处有、彼处无，是故为常。无常之法，有时是有、有时是无。如来不尔有时是有、有时是无，是故为常。常住之法无名无色，虚空常故，无名无色；如来亦尔，无名无色，是故为常。常住之法无因无果，虚空常故，无因无果；如来亦尔，无因无果，是故为常。常

⁹⁹ 大正藏：四仪；永乐北藏及龙基：四威仪

¹⁰⁰ 大正藏：性

¹⁰¹ 大正藏：性

¹⁰² 大正藏：性

¹⁰³ 大正藏：性

住之法，三世不摄。如来亦尔，三世不摄，是故为常。

“如来非幻，何以故？永断一切虚诳心故，是故非幻。亦非非幻，何以故？如来或时分此一身为无量身，无量之身复为一身，山壁直过，无有障阂¹⁰⁴，履水如地，入地如水，行空如地，身出烟焰如大火聚，云雷震动其声可畏；或为城邑、聚落、舍宅、山川、树木；或作大身；或作小身、男身、女身、童男女¹⁰⁵身。是故，如来亦非非幻。

“如来非定，何以故？如来于此拘尸城¹⁰⁶娑罗双树间示现入于般涅槃故，是故非定。亦非非定，何以故？常、乐、我、净故，是故如来亦非非定。

“如来非有漏，何以故？断三漏故，故非有漏。三漏者，欲界一切烦恼，除无明，是名欲漏；色、无色界一切烦恼，除无明，是名有漏；三界无明，名无明漏。如来永断，是故非漏。复次，一切凡夫不见有漏。云何凡夫不见有漏？一切凡夫于未来世悉有疑心：未来世中当得身耶？不得身耶？过去世中，身本有耶？为本无耶？现在世

¹⁰⁴ 大正藏：碍

¹⁰⁵ 大正藏：童女；永乐北藏及龙基：女

¹⁰⁶ 大正藏：拘尸那城；永乐北藏及龙基：拘尸城

中，是身有耶？是身无耶？若有我者，是色耶？非色耶？色非色耶？非色非非色耶？想耶？非想耶？想非想耶？非想非非想耶？是身属他耶？不属他耶？属不属耶？非属非不属耶？有命无身耶？有身无命耶？有身有命耶？无身无命耶？身之与命，有常耶？无常耶？常无常耶？非常非无常耶？身之与命，自在作耶？时节作耶？无因作耶？世性作耶？微尘作耶？法非法作耶？士夫作耶？烦恼作耶？父母作耶？我住心耶？住眼中耶？遍满身中耶？从何来耶？去何至耶？谁生耶？谁死耶？我于过去，是婆罗门姓耶？是刹利姓耶？是毗舍姓耶？是首陀¹⁰⁷姓耶？当于未来得何姓耶？我此身者，过去之时是男身耶？是女身耶？畜生身耶？若我杀生，当有罪耶？当无罪耶？乃至饮酒，当有罪耶？当无罪耶？我自作耶？为他作耶？我受报耶？身受报耶？如是疑见无量烦恼覆众生心。因是疑见生六种心：决定有我、决定无我、我见我、我见无我、无我见我、我作我受我知，是名邪见。如来永拔如是无量见漏根本，是故非漏。善男子，菩萨摩訶萨于大涅槃修圣行者，亦得永断如是诸漏。诸佛如来

¹⁰⁷ 大正藏：首陀罗；永乐北藏及龙基：首陀

常修圣行，是故无漏。

“善男子，凡夫不能善摄五根则有三漏，为恶所牵，至不善处。善男子，譬如恶马，其性很戾¹⁰⁸，能令乘者至险恶处。不能善摄此五根者亦复如是，令人远离涅槃善道至诸恶处。譬如恶象，心未调顺，有人乘之不随意去，远离城邑至空旷处。不能善摄此五根者亦复如是，将人远离涅槃城邑，至于生死旷野之处。善男子，譬如佞臣，教王作恶。五根佞臣亦复如是，常教众生造无量恶。善男子，譬如恶子，不受师长、父母教勅，则无恶不造。不调五根亦复如是，不受师长善言教勅，无恶不造。善男子，凡夫之人不摄五根，常为地狱、畜生、饿鬼之所贼害，亦如怨盗害及善人。善男子，凡夫之人不摄五根，驰骋五尘。譬如牧牛，不善守护，犯人苗稼。凡夫之人不摄五根，常在诸有多受苦恼。

“善男子，菩萨摩訶萨修大涅槃行圣行时，常能善调守摄五根，怖畏贪欲、瞋恚、愚痴、憍慢、嫉妬，为得一切诸善法故。善男子，若能善守此五根者则能摄心，若能摄心则摄五根。譬如有人，拥护于王则护国土，护国土者则护于王。

¹⁰⁸ 大正藏：很戾；永乐北藏及龙基：很戾

菩萨摩訶萨亦复如是，若得闻是大涅槃经则得智慧，得智慧故则得专念。五根若散，念则能止。何以故？是念慧故。善男子，如善牧者，设牛东西啖他苗稼，则便遮止，不令犯暴。菩萨摩訶萨亦复如是，念慧因缘故，守摄五根，不令驰散。

“菩萨摩訶萨有念慧者，不见我相，不见我所相，不见众生及所受用，见一切法同法性相，生于土石瓦砾之相。譬如屋舍，从众缘生，无有定性。见诸众生，四大五阴之所成立，推无定性。无定性故，菩萨于中不生贪著。一切凡夫见有众生故起烦恼。菩萨摩訶萨修大涅槃，有念慧故，于诸众生不生贪著。

“复次，菩萨摩訶萨修大涅槃经者，不著众生相、作种种法相。善男子，譬如画师，以众杂彩画作众像，若男、若女、若牛、若马。凡夫无知，见之则生男、女等相；画师了知无有男、女。菩萨摩訶萨亦复如是，于法异相观于一相，终不生于众生之相。何以故？有念慧故。菩萨摩訶萨修大涅槃，或时睹见端正女人，终不生于贪著之心。何以故？善观相故。

“善男子，菩萨摩訶萨知五欲法无有欢乐，不得暂停，如犬嚙枯骨，如人持火逆风而行，如

炭¹⁰⁹毒蛇，梦中所得，路边果树多人所掷，亦如段肉众鸟¹¹⁰竞逐，如水上泡，画水之迹，如织经尽，如囚趣市，犹如假借，势不得久。观欲如是，多诸过恶。

“复次，菩萨¹¹¹观诸众生为色、香、味、触因缘故，从昔无数无量劫来常受苦恼。一一众生，一劫之中，所积身骨如王舍城毗富罗山，所饮乳汁如四海水，身所出血复多于是。父母、兄弟、妻子、眷属命终哭泣所出目泪多四大海。尽地草木斩为寸¹¹²筹以数父母亦不能尽。无量劫来，或在地狱、畜生、饿鬼，所受行苦不可称计。凡¹¹³此大地犹如枣等易可穷极，生死无量不可得尽。菩萨摩訶萨如是深观，一切众生欲因缘故受苦无量。菩萨以是生死行苦故，不失念慧。

“善男子，譬如世间，有诸大众满二十五里，王勅一臣持一油钵，经由中过，莫令倾覆：‘若弃一滴，当断汝命。’复遣一人，拔刀在后，随而怖之。臣受王教，尽心坚持，经历尔所大众之中，虽见可意五邪欲等，心常念言：‘我若放逸，

¹⁰⁹ 大正藏：筐

¹¹⁰ 大正藏：鸟

¹¹¹ 大正藏：善男子，菩萨摩訶萨；永乐北藏及龙基：菩萨

¹¹² 大正藏：以为；永乐北藏及龙基：为寸

¹¹³ 大正藏：持

著彼邪欲，当弃所持，命不全济。’是人以是怖因缘故，乃至不弃一涕之油。菩萨摩訶萨亦复如是，于生死中，不失念慧，以不失故，虽见五欲，心不贪著。若见净色，不生色相，唯观苦相；乃至识相亦复如是，不作生相，不作灭相，不作因相，观和合相。菩萨尔时五根清净，根清净故，护根戒具。一切凡夫五根不净，不能善持，名曰根漏；菩萨永断，是故无漏；如来拔出永断根本，是故非漏。

“复次，善男子，复有离漏：菩萨¹¹⁴欲为无上甘露佛界¹¹⁵故离于恶漏。云何为离？若能修行大涅槃经，书写、受持、读诵、解说、思惟其义，是名为离。何以故？善男子，我都不见十二部经能离恶漏如此方等大涅槃经。善男子，譬如明¹¹⁶师教诸弟子，诸弟子中，有受教者心不造恶。菩萨¹¹⁷修大涅槃微妙经典亦复如是，心不造恶。善男子，譬如世间有善呪术，若有一闻，后二十年¹¹⁸不为一切毒药所中，蛇不能螫；若有诵者，乃至命尽无有众恶。善男子，是大涅槃亦复如是，

¹¹⁴ 大正藏：菩萨摩訶萨；永乐北藏及龙基：菩萨

¹¹⁵ 大正藏：果

¹¹⁶ 大正藏：良

¹¹⁷ 大正藏：菩萨摩訶萨；永乐北藏及龙基：菩萨

¹¹⁸ 大正藏：却后七年；永乐北藏及龙基：后二十年

若有众生一经耳者，却后七劫不堕恶道；若有书写、读诵、解说、思惟其义，必得阿耨多罗三藐三菩提，得¹¹⁹见佛性，如彼圣王得甘露味。

“善男子，是大涅槃经¹²⁰有如是等无量功德。善男子，若有人能书写是经、读诵、解说、为他敷演、思惟其义，当知是人真我弟子，善受我教，是我所见，我之所念。是人谛知我不涅槃，随如是人所住之处，若城邑聚落、山林旷野、房舍田宅、楼阁殿堂，我亦在中常住不移，我于是人常作受施，或作比丘、比丘尼、优婆塞、优婆夷、婆罗门、梵志、贫穷乞人。

“云何当令是人得知如来受其所施¹²¹？善男子，是人或于夜卧梦中梦见佛像，或见诸天¹²²、沙门之像，国主、圣王、师子王像，莲华形像，优昙华像，或见大山，或大海水，或见日、月，或见白象及白马像，或见父母，得华得果、金、银、琉璃、玻瓈等宝、五种牛味。尔时，当知即是如来受其所施。寤已喜乐，寻得种种所须之物，心不念恶，乐修善法。善男子，是大涅槃悉能成就如是无量阿僧祇等不可思议无边功德。

¹¹⁹ 大正藏：净

¹²⁰ 大正藏：大涅槃；永乐北藏及龙基：大涅槃经

¹²¹ 大正藏：所施之物；永乐北藏及龙基：所施

¹²² 大正藏：天像；永乐北藏及龙基：诸天

“善男子，汝今应当信受我语。若有善男子、善女人，欲见我者；欲恭敬我；欲同法性而见于我；欲得空定；欲见实相；欲得修习首楞严定、师子王定；欲破八魔——八魔者，所谓四魔、无常、无乐、无我、无净；欲得人中天上乐者，见有受持大涅槃经、书写、读诵、为他解说、思惟义者，当往亲近、依附、咨受、供养、恭敬、尊重、赞叹，为洗手足，布置床席，四事供给，令无所乏。若从远来，应十由旬¹²³路次奉迎。为是经故，所重之物应以奉献；若¹²⁴其无者，应自卖身。何以故？是经难遇过优昙华。

“善男子，我念过去无量无边那由他劫，尔时世界名曰娑婆，有佛世尊号释迦牟尼如来、应供、正遍知、明行足、善逝、世间解、无上士、调御丈夫、天人师、佛、世尊，为诸大众宣说如是大涅槃经。我于尔时，从善友所转闻彼佛当为大众说大涅槃。我闻是已，心中¹²⁵欢喜，欲设供养。居贫无物，周行¹²⁶卖身，薄福不售，即欲还家，路见一人，而复¹²⁷语言：‘吾欲卖身，君能

¹²³ 大正藏：延

¹²⁴ 大正藏：如

¹²⁵ 大正藏：其心；永乐北藏及龙基：心中

¹²⁶ 大正藏：欲自；永乐北藏及龙基：周行

¹²⁷ 大正藏：便

买不？’其人答言¹²⁸：‘我家作业，人无堪者。汝设能为，我当买汝。’我即问言：‘有何作业人无堪者¹²⁹？’其人答言：‘吾有恶病，良医处药：“应当日服人肉三两。”卿若能以身肉三两日日见给，便当与汝金钱五枚。’我时闻已，心大¹³⁰欢喜。即¹³¹复语言：‘汝与我钱，惠¹³²我七日，须我事讫，便还相就。’其人答言：‘七日不可，审能尔者，听汝¹³³一日。’善男子，我于尔时即取其钱，还至佛所头面礼足，尽其所有而以奉献，然后诚心听受是经。我时暗钝，虽得闻经，唯能受持一偈文句：

如来证涅槃 永断于生死

若能¹³⁴至心听 常得无量乐

“受是偈已，即便还至彼病人家。

“善男子，我时虽复日日与三两肉，以念偈因缘故，不以为痛，日日不废，足满一月。

“善男子，以是因缘，其病得差，我身平复亦无疮痍。我时见身，具足完具，即发阿耨多罗

¹²⁸ 大正藏：曰

¹²⁹ 大正藏：能

¹³⁰ 大正藏：中

¹³¹ 大正藏：我

¹³² 大正藏：假

¹³³ 大正藏：当许；永乐北藏及龙基：听汝

¹³⁴ 大正藏：有

三藐三菩提心。一偈之力尚能如是，何况具足受持读诵？我见此经有如是利，复倍发心：‘愿于未来成得佛道，字释迦牟尼。’

“善男子，以是一偈因缘力故，令我今日于大众中，为诸天人具足宣说。

“善男子，以是因缘，是大涅槃不可思议，成就无量无边功德，乃是诸佛如来甚深秘密之藏。以是义故，能受持者，断离恶漏。所谓恶者，恶象、恶马、恶牛、恶狗、毒蛇住处、恶刺土地、悬崖峻岸、暴雨洄渚、恶人、恶国、恶城、恶舍、恶知识等。如是等辈，若作漏因，菩萨即离，若不能作则不远离；若增有漏则便离之，若不增者¹³⁵则不远离；若作恶法则便离之，若能作善则不远离。云何为离？不持刀杖，常以正慧方便而远离之，是故名为正慧远离，为生善法则离恶法。

“菩萨摩訶萨自观其身如病、如疮、如痛、如怨、如箭入体，是大苦聚，悉是一切善恶根本。是身虽复不净如是，菩萨犹故瞻视将养。何以故？非为贪身，为善法故；为于涅槃，不为生死；为常、乐、我、净，不为无常、无我乐净¹³⁶；为菩

¹³⁵ 大正藏：长

¹³⁶ 大正藏：乐我净；永乐北藏及龙基：我乐净

提道，不为有道；为于一乘，不为三乘；为三十二相、八十种好微妙之身，不为乃至非有想非无想身；为法轮王，不为转轮王。善男子，菩萨摩訶萨常当护身。何以故？若不护身，命则不全；命若不全，则不能得书写是经、受持、读诵、为他广说、思惟其义。是故，菩萨应善护身。以是义故，菩萨得离一切恶漏。

“善男子，如欲度¹³⁷水，善护船筏¹³⁸；临路之人，善护良马；田夫种植，善护粪秽；如为蚤¹³⁹毒，善护毒蛇；如人为财，护旃陀罗；为坏贼故，养护健将；亦如寒人，爱护于火；如癩病者，求于毒药。菩萨摩訶萨亦复如是，虽见是身无量不净具足充满，为欲受持大涅槃经故，犹好将护，不令乏少。菩萨摩訶萨观于恶象及恶知识等无有二，何以故？俱坏身故。菩萨¹⁴⁰于恶象等心无恐怖¹⁴¹，于恶知识生畏惧心，何以故？是恶象等唯能坏身不能坏心，恶知识者二俱坏故；是恶象等唯坏一身，恶知识者坏无量善身、无量善心；是恶象等唯能破坏不净臭身，恶知识者能坏净身及

¹³⁷ 大正藏：渡

¹³⁸ 大正藏：楫

¹³⁹ 大正藏：差

¹⁴⁰ 大正藏：菩萨摩訶萨；永乐北藏及龙基：菩萨

¹⁴¹ 大正藏：怖惧；永乐北藏及龙基：恐怖

以净心；是恶象等能坏肉身，恶知识者坏于法身；为恶象杀不至三趣，为恶友杀必至三趣；是恶象等但为身怨，恶知识者为善法怨。是故，菩萨常当远离诸恶知识。如是等漏凡夫不离，是故生漏；菩萨离之则不生漏。菩萨如是尚无有漏，况于如来？是故非漏。

“云何亲近漏？一切凡夫受取衣、食、卧具、医药，为身心乐求如是物，造种种恶，不知过患¹⁴²轮回三趣，是故名漏。菩萨¹⁴³见如是过，则便远离。若须衣时，即便受取，不为身故，但为于法；不长憍慢，心常卑下；不为严饰，但为羞耻，障诸寒暑、恶风、恶雨、恶虫、蚊、虻、蝇、蚤、蝮螫。虽受饮食，心无贪著；不为身故，常为正法；不为肤体，但为众生；不为憍慢，为身力故；不为怨害，为治饥疮；虽得上味，心无贪著。受取房舍亦复如是，贪慢之结不令居心，为菩提舍，遮止结贼，障恶风雨，故受屋舍。求医药者，心无贪慢，但为正法，不为寿命，为常命故。

“善男子，如人病疮，为酥¹⁴⁴麩涂，以衣裹之；为出脓血，酥¹⁴⁵麩涂傅；为愈疮¹⁴⁶故，以药

¹⁴² 大正藏：味

¹⁴³ 大正藏：菩萨摩訶萨；永乐北藏及龙基：菩萨

¹⁴⁴ 大正藏：苏

¹⁴⁵ 大正藏：苏

空之；为恶风故，在深屋中。菩萨摩訶萨亦复如是，观身是疮故以衣覆，为九孔漏¹⁴⁷求索饮食，为恶风雨受取房舍，为四毒发求觅医药。菩萨摩訶萨¹⁴⁸受四种供养，为菩提道，非为寿命。何以故？菩萨摩訶萨作是思惟：‘我若不受是四供养，身则磨灭，不得坚牢；若不坚牢，则不忍苦；若不忍苦，则不能得修习善法；若能忍苦，则得修习无量善法。我若不能堪忍众苦，则于苦受生瞋恚心，于乐受中生贪著心。若求乐不得，则生无明。’是故，凡夫于四供养生于有漏，菩萨摩訶萨能深观察，不生于漏。是故，菩萨名为无漏。云何如来当名有漏？是故如来不名有漏。

“复次，善男子，一切凡夫虽善护身，心犹故生于三种恶觉。以是因缘，虽断烦恼得生非想非非想处，犹故还堕三恶道中。善男子，譬如有人度于大海，垂至彼岸，没水而死。凡夫之人亦复如是，垂尽三有，还堕三涂。何以故？无善觉故。何等善觉？所谓六念处。凡夫之人，善心羸劣，不善炽盛。善心羸故，慧心薄少；慧心薄故，增长诸漏。菩萨摩訶萨眼根¹⁴⁹清净，见三觉过，

¹⁴⁶ 大正藏：痊愈；永乐北藏及龙基：愈疮

¹⁴⁷ 大正藏：脓

¹⁴⁸ 大正藏：菩萨；永乐北藏及龙基：菩萨摩訶萨

¹⁴⁹ 大正藏：慧眼；永乐北藏及龙基：眼根

知是三觉有种种患，常与众生作三乘怨。三觉因缘乃令无量凡夫众生不见佛性，无量劫中生颠倒心，谓佛世尊无常、乐、我，唯有一净，如来毕竟入于涅槃。一切众生无常、无乐、无我、无净，颠倒心故，言有常、乐、我、净。实无三乘，颠倒心故，言有三乘。一实之道真实不虚，颠倒心故，言无一实。是三恶觉常为诸佛及诸菩萨之所呵责，是三恶觉常害于我，或亦害他。有是三觉，一切诸恶常来随从。是三觉者，即为¹⁵⁰三缚，连缀众生无边生死。菩萨摩訶萨常作如是观察三觉。

“菩萨或时有因缘故，应生欲觉，默然不受。譬如端正净洁之人，不受一切秽污¹⁵¹不净；如热铁丸，人无受者；如婆罗门性，不受牛肉；如饱满人，不受恶食；如转轮王，不与一切旃陀罗等同坐一床。菩萨摩訶萨恶贱三觉，不受不味亦复如是。何以故？菩萨思惟：‘众生知我是良福田，我当云何受是恶法？若受恶觉，则不任为众生福田。我自不言是良福田，众生见相，便言我是。我今若起如是恶觉，则为欺诳一切众生。我于往昔以欺诳故，无量劫中流转生死，堕三恶道。我

¹⁵⁰ 大正藏：是

¹⁵¹ 大正藏：粪秽；永乐北藏及龙基：秽污

若恶心受人信施，一切天人及五通仙悉当证知而见呵责。我若恶觉受人信施，或令施主果报减少，或空无报。我若恶心受檀越施，则与施主而为讎怨¹⁵²。一切施主恒于我所起赤子想，我当云何欺诳于彼而生怨想？何以故？或令施主不得果报，或少果报¹⁵³。我常自称为出家人，夫出家者不应起恶，若起恶者则非出家。出家之人，身口相应，若不相应则非出家。我弃父母、兄弟、妻子、眷属、知识，出家修道，正是修习诸善觉时，非是修习不善觉时。譬如有人入海求宝，不取真珠，而¹⁵⁴取水精。亦如有人弃妙音乐，游戏粪秽。如舍宝女，爱念婢使¹⁵⁵。如弃金器，而用瓦盂。如弃甘露，服食毒药。如舍亲旧、贤善、良医，反从怨憎求药自疗。我亦如是，舍离大师如来世尊甘露法味，而服魔怨种种恶觉。人身难得如优昙华，我今已得；如来难值过优昙华，我今已值；清净法宝难得见闻，我今已闻。犹如盲龟值浮木孔，人命不停过于山水，今日虽存，明亦难保。云何纵心令住恶法？壮色不停犹如奔马，云¹⁵⁶何

¹⁵² 大正藏：怨讎；永乐北藏及龙基：讎怨

¹⁵³ 大正藏：或少果报故；永乐北藏及龙基：或少果报

¹⁵⁴ 大正藏：直

¹⁵⁵ 大正藏：卑陋；永乐北藏及龙基：婢使

¹⁵⁶ 大正藏：云；永乐北藏及龙基：如；本校勘：云

恃怙而生憍慢？犹如恶鬼伺求人过；四大恶鬼亦复如是，常来伺求我之过失。云何当令恶觉发起？譬如朽宅、垂崩之屋，我命亦尔，云何起恶？我名沙门，沙门之人名觉¹⁵⁷善觉，我今乃起不善之觉，云何当得名为沙门¹⁵⁸？我名出家，出家之人名修善道，我今行恶，云何当得名为出家？我今名为真婆罗门，婆罗门者名修净行，我今乃行不净恶觉，云何当得名婆罗门？我今亦名刹利大姓，刹利姓者能除怨敌，我今不能除恶怨敌，云何当得名刹利姓？我名比丘，比丘之人名破烦恼，我今不破恶觉烦恼，云何当得名为比丘？世有六处难可值遇，我今已得。云何当令恶觉居心？何等为六？一，佛世难值¹⁵⁹；二，正法难闻；三，怖心难起；四，中国难生；五，人身难得；六，诸根难具。如是六事难得已得，是故不应起于恶觉。’

“菩萨尔时修行如是大涅槃经，常勤观察是诸恶心。一切凡夫不见如是恶心过患，故受三觉，名为受漏。菩萨见已，不受不著，放舍不护，依八圣道推之令去，斩之令断。是故，菩萨无有受漏。云何当言如来有漏？以是义故，如来世尊非

¹⁵⁷ 大正藏：学

¹⁵⁸ 大正藏：沙门也；永乐北藏及龙基：为沙门

¹⁵⁹ 大正藏：遇

是有漏。

大般涅槃经卷第二十

大般涅槃经卷第二十一

北凉天竺三藏昙无讖译 梵

宋沙门慧严慧观同谢灵运再治

高贵德王菩萨品第二十二之三¹⁶⁰

“复次，善男子，凡夫若遇身心苦恼起种种恶，若得身病，若得心病，令身、口、意作种种恶。以作恶故，轮回三趣，具受诸苦。何以故？凡夫之人无念慧故，是故生于种种诸漏，是名念漏。

“菩萨摩訶萨常自思惟：‘我从往昔无数劫来，为是身心造种种恶，以是因缘流转生死，在三恶道具受众苦，遂令我远三乘正路。’菩萨以是恶因缘故，于己身心生大怖畏，舍离众恶，趣向善道。

“善男子，譬如有王，以四毒蛇盛之一筐，令人养食，瞻视卧起，摩洗其身。‘若令一蛇生瞋恚者，我当准法，戮之都市。’尔时，其人闻王切令，心生惶怖，舍筐逃走。王时复遣五旃陀罗拔刀随之。其人回顾，见后五人，遂疾舍去。

¹⁶⁰ 大正藏：光明遍照高贵德王菩萨品之三

是时，五人以恶方便藏所持刀，密遣一人诈为亲善，而语之言：‘汝可来还¹⁶¹。’其人不信，投一聚落，欲自隐匿。既入聚中，窥视诸舍都不见人，执诸瓠¹⁶²器悉空无物。既不见人，求物不得，即便坐地，闻空中声：‘咄哉！男子，此聚空旷无有居民，今夜当有六大贼来。汝设遇者，命将不全。汝当云何而得免之？’尔时，其人恐怖渐¹⁶³增，复舍而去。路值一河，河水漂急，无有船筏¹⁶⁴。以怖畏故，即取种种草木为筏。复更思惟：‘我设住此，当为毒蛇、五旃陀罗、一诈亲善¹⁶⁵及六大贼之所危害。若度此河，筏不可依，当没水死。宁没水死，终不为彼蛇、贼损¹⁶⁶害。’即推草筏，置之水中，身倚其上，运手动足，截流而去。即¹⁶⁷达彼岸，安隐无患，心意泰然，恐怖消除。

“菩萨摩訶萨得闻受持大涅槃经，观身如筐，地、水、火、风如四毒蛇，见毒、触毒、气毒、啗毒，一切众生遇是四毒故丧其命。众生四大亦

¹⁶¹ 大正藏：还来；永乐北藏及龙藏：来还

¹⁶² 大正藏：瓠

¹⁶³ 大正藏：遂

¹⁶⁴ 大正藏：筏（后同）

¹⁶⁵ 大正藏：者

¹⁶⁶ 大正藏：所

¹⁶⁷ 大正藏：既

复如是，或见为恶，或触为恶，或气为恶，或啗为恶，以是因缘远离众善。

复次，善男子，菩萨摩訶萨观四毒蛇有四种性¹⁶⁸，所谓刹利、婆罗门、毗舍、首陀。是四大蛇亦复如是，有四种性：坚性、湿性、热性、动性。是故，菩萨观是四大与四毒蛇同其种性。

复次，善男子，菩萨摩訶萨观是四大如四毒蛇。云何为观？是四毒蛇常伺人便，何时当视？何时当触？何时当嘘？何时当啗？四大毒蛇亦复如是，常伺众生，求其短缺。若为四蛇之所杀者，终不至于三恶道中；若为四大之所杀害，必至三恶，定无有疑。是四毒蛇虽复瞻养，亦欲杀人；四大亦尔，虽常供给，亦常牵人造作众恶。是四毒蛇，若一瞋者则能杀人；四大之性亦复如是，若一大发亦能害人。是四毒蛇虽同一处，四心各异；四大毒蛇亦复如是，虽同一处，性各别异。是四毒蛇虽复恭敬，难可亲近；四大毒蛇亦复如是，虽复恭敬，亦难亲近。是四毒蛇若害人时，或有沙门、婆罗门等，若以呪药则可疗治；四大杀人，虽有沙门、婆罗门等神呪良药，皆不能治。如自喜人，闻四毒蛇气臭可恶则便远离；

¹⁶⁸ 大正藏：姓

诸佛菩萨亦复如是，闻四大臭即便远离。尔时，菩萨复更思惟四大毒蛇，生大怖畏，背之驰趣¹⁶⁹，修八圣道。

“五旃陀罗者¹⁷⁰即是五阴。云何菩萨观于五阴如旃陀罗？旃陀罗者，常能令人恩爱别离、怨憎集会；五阴亦尔，令人贪近不善之法，远离一切淳¹⁷¹善之法。

“复次，善男子，如旃陀罗，种种器仗以自庄严，若刀、若盾¹⁷²、若弓、若箭、若铠、若稍，能害于人；五阴亦尔，以诸烦恼牢自庄严，害诸痴人令堕诸有。善男子，如旃陀罗，有过之人得便害之；五阴亦尔，有诸结过，常能害人。是故，菩萨深观五阴如旃陀罗。

“复次，菩萨观察五阴如旃陀罗，旃陀罗人无慈悯心，怨亲俱害；五阴亦尔，无慈悯心，善恶俱害。如旃陀罗恼一切人；五阴亦尔，以诸烦恼常恼一切生死众生。是故，菩萨观于五阴如旃陀罗。

“复次，菩萨观察五阴如旃陀罗，旃陀罗人常怀害心；五阴亦尔，常怀诸结恼害之心。如人

¹⁶⁹ 大正藏：走

¹⁷⁰ 大正藏：旃陀罗；永乐北藏及龙藏：旃陀罗者

¹⁷¹ 大正藏：纯

¹⁷² 大正藏：楯

无足、刀仗¹⁷³、侍从，当知必为旃陀罗人之所杀害；众生亦尔，无足、无刀、无有侍从，则为五阴之所贼害。足名为戒，刀名为慧，侍从名为诸善知识¹⁷⁴。无此三事故，为五阴之所贼害。是故，菩萨观于五阴如旃陀罗。

“复次，善男子，菩萨摩訶萨观察五阴过旃陀罗。何以故？众生若为五旃陀罗之所杀者，不堕地狱；为阴杀者，则堕地狱。是故¹⁷⁵，菩萨观察五阴¹⁷⁶过旃陀罗。作是观已，而作愿言：‘我宁终身近旃陀罗，不能暂时亲近五阴。旃陀罗者，惟¹⁷⁷能害于欲界痴人；是五阴贼，遍害三界凡夫众生。旃陀罗人，唯能杀戮有罪之人；是五阴贼，不问众生有罪无罪，悉能害之。旃陀罗人，不害衰老、妇女、稚小；是五阴贼不问众生老小、妇女¹⁷⁸，一切悉害。’是故，菩萨深观五¹⁷⁹阴过旃陀罗，是故发愿：‘宁当终身近旃陀罗，不能暂时亲近五阴。’

“复次，善男子，旃陀罗者，唯害他人，终

¹⁷³ 大正藏：杖

¹⁷⁴ 大正藏：善知识也；永乐北藏及龙藏：诸善知识

¹⁷⁵ 大正藏：以是义故；永乐北藏及龙藏：是故

¹⁷⁶ 大正藏：菩萨观阴；永乐北藏及龙藏：菩萨观察五阴

¹⁷⁷ 大正藏：唯

¹⁷⁸ 大正藏：女弱；永乐北藏及龙藏：妇女

¹⁷⁹ 大正藏：此

不自害；五阴之贼自害害他¹⁸⁰。旃陀罗人可以善言、钱财、宝货求而得脱；五阴不尔，不可强以善言诱喻、钱财、宝货求而得脱。旃陀罗人于四时中不必常杀；五阴不尔，常于念念害诸众生。旃陀罗人唯在一处，可有逃避；五阴不尔，遍一切处，无可逃避。旃陀罗人，虽复害人，害已不随；五阴不尔，杀众生已，随逐不离。是故，菩萨宁以终身近旃陀罗，不能暂时亲近五阴。

“有智之人以善方便得脱五阴。善方便者，即八圣道、六波罗蜜、四无量心。以是方便而得解脱，身心不为五阴所害。何以故？身如金刚，心如虚空，是故，身心难可沮坏。以是义故，菩萨观阴成就种种诸不善法，生大怖畏，修八圣道。亦如彼人畏四毒蛇、五旃陀罗，涉路而去，无所顾留。

“诈亲善者，名为贪爱。菩萨摩訶萨深观爱结如怨诈亲。若知实者，则无能为；若不知者¹⁸¹，必为所害。贪爱亦尔，若知其性，则不能令众生轮转生死苦中；若不知者¹⁸²，轮回六趣，具受众苦。何以故？爱之为病，难舍离故，如怨诈亲难

¹⁸⁰ 大正藏：害他及旃陀罗；永乐北藏及龙藏：害他

¹⁸¹ 大正藏：能知；永乐北藏及龙藏：知者

¹⁸² 大正藏：如其不知；永乐北藏及龙藏：若不知者

可远离。怨诈亲者，常伺人便，令爱别离、怨憎合会。爱亦如是，令人远离一切善法，近于一切不善之法。以是义故，菩萨摩訶萨深观贪爱如怨诈亲，见不见故，闻不闻故。如凡夫人见生死过，虽有智慧，以痴覆故，后还不见；声闻、缘觉亦复如是，虽见不见，虽闻不闻。何以故？以爱心故。所以者何？见生死过不能疾至阿耨多罗三藐三菩提。以是义故，菩萨摩訶萨观此爱结如怨诈亲。

“云何名为怨诈亲相？如怨不实，诈现实相；不可亲近，诈现近相；实是不善，诈现善相；实是不爱，诈为爱相。何以故？常伺人便，欲为害故。爱亦如是，常为众生非实诈实，非近诈近，非善诈善，非爱诈爱，常逛一切轮回生死。以是义故，菩萨观爱如怨诈亲。

“怨诈亲者，但见身、口，不睹其心，是故能逛。爱亦如是，唯为虚逛，实不可得，是故能惑一切众生。怨诈亲者，有始有终，易可远离；爱不如是，无始无终，难可远离。怨诈亲者，远则难知¹⁸³，近则易觉¹⁸⁴；爱不如是，近尚难识¹⁸⁵，

¹⁸³ 大正藏：觉

¹⁸⁴ 大正藏：知

¹⁸⁵ 大正藏：知

况复远知¹⁸⁶？以是义故，菩萨观爱过于诈亲。一切众生以爱结故，远大涅槃，近于生死；远常、乐、我、净，近无常、苦、无我、不净。是故，我于处处经中说为三垢。于现在事，以无明故，不见过患，不能舍离。爱怨诈亲，终不能害有智之人。是故，菩萨深观此爱，生大怖畏，修八圣道，犹如彼人畏四毒蛇、五旃陀罗及一诈亲，涉路不回。

“空聚落者，即内六入。菩萨摩訶萨观此¹⁸⁷六入空无所有，犹如空聚。如彼怖人，既入聚已，乃至不见有一居人，遍捉瓠¹⁸⁸器不得一物；菩萨亦尔，谛观六入空无所有，不见众生、一物之实。是故，菩萨观内六入空无所有，如彼空聚。

“善男子，彼空聚落，群贼远望，终不生于空虚之想；凡夫之人亦复如是，于六入聚不生空想。以其不能生空想故，轮回生死，受无量苦。

“善男子，群贼既至，乃生空想；菩萨亦尔，观此六入常生空想。生空想故，则不轮回生死受苦。菩萨摩訶萨于此六入常无颠倒；无颠倒故，是故不复轮回生死。

¹⁸⁶ 大正藏：耶

¹⁸⁷ 大正藏：是

¹⁸⁸ 大正藏：瓠

“复次，善男子，如有群贼入此空聚则得安乐；烦恼诸贼亦复如是，入此六入则得安乐。如贼住空聚，心无所畏；烦恼群贼亦复如是，住是六入亦无所畏。如彼空聚乃是师子、虎、狼、种种恶兽之所住处；是内六入亦复如是，一切众恶烦恼恶兽之所住处。是故，菩萨深观六入空无所有，纯是一切不善住处。

“复次，善男子，菩萨¹⁸⁹观内六入空无所有，如彼空聚。何以故？虚诞不实故，空无所有作有想故，实无有乐作乐想故，实无有人作人想故；内六入者亦复如是，空无所有而作有想，实无有乐而作乐想，实无有人而作人想。唯有智人乃能知之，得其真实。

“复次，善男子，如空聚落，或时有人，或时无入。六入不尔，一向无人。何以故？性常空故。智者所知，非是眼见。是故，菩萨观内六入多诸怨害，修八圣道不休不息，犹如彼人畏四毒蛇、五旃陀罗、一诈亲善及六大贼，怖著正路。

“六大贼者，即外六尘。菩萨摩訶萨观此六尘如六大贼，何以故？能劫一切诸善法故。如六大贼能劫一切人民财宝；是六尘贼亦复如是，能

¹⁸⁹ 大正藏：菩萨摩訶萨；永乐北藏及龙藏：菩萨

劫一切众生善财。如六大贼，若入人舍则能劫夺现家所有，不择好恶，令巨富者忽然¹⁹⁰贫穷。是六尘贼亦复如是，若入人根，则能劫夺一切善法；善法既尽，贫穷孤露，作一阐提。是故，菩萨谛观六尘如六大贼。

“复次，善男子，如六大贼，欲劫人时，要因内人；若无内人，则便中还。是六尘贼亦复如是，欲劫善法，要因内有众生知见、常乐我净、不空等相，若内无有如是等相，六尘恶贼则不能劫一切善法。有智之人内无是相，凡夫则有。是故，六尘常来侵夺善法之财。不善护故，为其所劫。护者名慧，有智之人能善防护，故不被劫。是故，菩萨观是六尘如六大贼，等无差别。

“复次，善男子，如六大贼能为人民身心苦恼；是六尘贼亦复如是，常为众生身心苦恼。六大贼者，唯能劫人现在财物；是六尘贼常劫众生三世善财。六大贼者，夜则欢乐；六尘恶贼亦复如是，处无明暗则得欢乐。是六大贼，唯有诸王乃能遮止；六尘恶贼亦复如是，唯佛菩萨乃能遮止。是六大贼凡欲劫夺，不择端正、种性¹⁹¹、聪

¹⁹⁰ 大正藏：尔

¹⁹¹ 大正藏：姓

哲、多闻、博学、豪贵、贫贱；六尘恶贼亦复如是，欲劫善法，不择端正乃至贫贱。是六大贼，虽有诸王截其手足，犹故不能令其心息；六尘恶贼亦复如是，虽须陀洹、斯陀含、阿那含截其手足，亦不能令不劫善法。如勇健人乃能摧伏是六大贼；诸佛菩萨亦复如是，乃能摧伏六尘恶贼。譬如有人，多诸种族，宗党炽盛，则不为彼六贼所劫；众生亦尔，有善知识，不为六尘恶贼所劫。是六大贼，若见人物则能偷劫；六尘不尔，若见、若知、若闻、若嗅、若触、若觉，皆悉能劫。六大贼者，唯能劫夺欲界人财，不能劫夺色、无色界；六尘恶贼则不如是，能劫三界一切善宝。是故，菩萨谛观六尘过彼六贼。作是观已，修八圣道，直往不回，如彼怖人畏四毒蛇、五旃陀罗、一诈亲善及六大贼，舍空聚落，涉路而去。

“路值一河者，即是烦恼。云何菩萨观此烦恼犹如大河？如彼驶河能漂香象；烦恼驶河亦复如是，能漂缘觉。是故，菩萨深观烦恼犹如驶河。深难得底故名为河，边不可得故名为大，其中多有种种恶鱼。烦恼大河亦复如是，唯佛菩萨能得底故，故名极深；唯佛菩萨得其边故，故名广大；常害一切痴众生故，故名恶鱼。是故，菩萨观此

烦恼犹如大河。如大河水能长一切草木丛林；烦恼大河亦复如是，能长众生二十五有。是故，菩萨观此烦恼犹如大河。

“譬如有人，堕大河水无有惭愧；众生亦尔，堕烦恼河无有惭愧。如堕河者，未得其底即便命终；堕烦恼河亦复如是，未尽其底，周回轮转二十五有。所言底者，名为空相。若有不修如是空相，当知是人不得出离二十五有。一切众生不能善修空无相故，常为烦恼驶河所漂。如彼大河，唯能坏身，不能漂没一切善法；烦恼大河则不如是，能坏一切身、心善法。彼大暴河唯能漂没欲界中人；烦恼大河乃能漂没三界人天。世间大河，运动手¹⁹²足则到彼岸；烦恼大河，唯有菩萨因六波罗蜜乃能得度¹⁹³。

“如大河水难可得度；烦恼大河亦复如是，难可得度。云何名为难可得度？乃至十住诸大菩萨犹故未能毕竟得度，唯有诸佛乃毕竟度，是故名为难可得度。譬如有人为河所漂，不能修习毫厘善法；众生亦尔，为烦恼河所漂没者，亦复不能修习善法。如人堕河，为水所漂，余有力者则

¹⁹² 大正藏：手动；永乐北藏及龙藏：动手

¹⁹³ 大正藏：渡（后同）

能拔济；堕烦恼河为一阐提，声闻、缘觉乃至诸佛不能救¹⁹⁴济。世间大河劫尽之时七日并照，能令枯涸；烦恼大河则不如是，声闻、缘觉虽修七觉，犹不能干。是故，菩萨观诸烦恼犹如暴河。

“譬如彼人，畏四毒蛇、五旃陀罗、一诈亲善及六大贼，舍空聚落，随路而去，既至河上，取草为筏者¹⁹⁵。菩萨亦尔，畏四大蛇、五阴旃陀罗、爱诈亲善、六入空聚、六尘恶贼，至烦恼河修戒、定、慧、解脱、解脱知见、六波罗蜜、三十七品以为船筏¹⁹⁶，依乘此筏¹⁹⁷度烦恼河，到于彼岸常乐涅槃。菩萨修行大涅槃者，作是思惟：

‘我若不能忍受如是身苦、心苦，则不能令一切众生度烦恼河。’以是思惟，虽有如是身心苦恼，默然忍受。以忍受故，则不生漏。如是菩萨尚无诸漏，况佛如来而当有漏？是故，诸佛不名有漏。云何如来非无漏耶？如来常行有漏中故，有漏即是二十五有。是故，声闻、凡夫之人言佛有漏，诸佛如来真实无漏。

“善男子，以是因缘，诸佛如来无有定相。

“善男子，是故，犯四重禁、谤方等经及一

¹⁹⁴ 大正藏：拔

¹⁹⁵ 大正藏：聚草为筏；永乐北藏及龙藏：取草为筏者

¹⁹⁶ 大正藏：筏

¹⁹⁷ 大正藏：筏

阐提悉皆不定。”

尔时，光明遍照高贵德王菩萨摩訶萨言：“如是如是，诚如圣言¹⁹⁸！一切诸法悉皆不定，以不定故，当知如来亦不毕竟入于涅槃。如佛上¹⁹⁹说：菩萨摩訶萨修大涅槃，闻不闻中有涅槃、有大涅槃²⁰⁰。云何涅槃？云何大涅槃？”

尔时，佛赞光明遍照高贵德王菩萨摩訶萨言：“善哉！善哉！善男子，若有菩萨得念总持，乃能如汝之所咨问。

“善男子，如世人言，有海、大海，有河、大河，有山、大山，有地、大地，有城、大城，有众生、大众生，有王、大王，有人、大人，有天、天中天，有道、大道；涅槃亦尔，有涅槃、有大涅槃。云何涅槃？善男子，如人饥饿，得少饭食名为安乐，如是安乐亦名涅槃；如病得差则得²⁰¹安乐，如是安乐亦名涅槃；如人怖畏，得归依处则得安乐，如是安乐亦名涅槃；如贫穷人获七宝物则得安乐，如是安乐亦名涅槃；如人观骨，不起贪欲则得安乐，如是安乐亦名涅槃。如是涅槃不得名为大涅槃也。何以故？以饥渴故、病故、

¹⁹⁸ 大正藏：教

¹⁹⁹ 大正藏：先

²⁰⁰ 大正藏：大涅槃；永乐北藏及龙藏：有大涅槃

²⁰¹ 大正藏：名

怖故、贫故、生贪著故，是名涅槃，非大涅槃。

“善男子，若凡夫人及以声闻，或因世俗，或因圣道，断欲界结，则得安乐，如是安乐亦名涅槃，不得名为大涅槃也。能断初禅，乃至能断非想非非想处结，则得安乐，如是安乐亦名涅槃，不得名为大涅槃也。何以故？还生烦恼，有习气故。云何名为烦恼习气？声闻、缘觉有烦恼气，所谓我身、我衣、我去、我来、我说、我听。诸佛如来入于涅槃，涅槃之性无我无乐唯有常净，是则名为烦恼习气。佛、法、众僧有差别相，如来毕竟入于涅槃，声闻、缘觉、诸佛如来所得涅槃等无差别，以是义故，二乘所得非大涅槃。何以故？无常、乐、我、净故。常、乐、我、净乃得名为大涅槃也。

“善男子，譬如有处能受众流²⁰²，名为大海。随有声闻、缘觉、菩萨、诸佛如来所入之处名大涅槃。四禅、三三昧、八背舍、八胜处、十一切处，随能摄取如是无量诸善法者，名大涅槃。

“善男子，譬如有河，第一香象不能得底，则名为大。声闻、缘觉至十住菩萨不见佛性，名为涅槃，非大涅槃；若能了了见于佛性，则得名

²⁰² 大正藏：水

为大涅槃也。是大涅槃，唯大象王能尽其底，大象王者，谓诸佛也。

“善男子，若摩诃那伽及钵建²⁰³陀大力士等，经历多时所不能上，乃名大山；声闻、缘觉及诸菩萨摩诃那伽大力士等所不能见，如是乃名大涅槃也。

“复次，善男子，随有小王之所住处名为小城，转轮圣王所住之处乃名大城；声闻、缘觉八万、六万、四万、二万、一万住处，名为涅槃，无上法主圣王住处，乃得名为大般涅槃。以是故，名大般涅槃。

“善男子，譬如有人，见四种兵不生怖畏，当知是人名大众生。若有众生于三恶道烦恼恶业不生怖畏，而能于中广度众生，当知是人得大涅槃。若有人能供养父母，恭敬沙门及婆罗门，修治善法，所言诚实，无有欺诳，能忍诸恶，惠施贫乏，名大丈夫。菩萨亦尔，有大慈悲，怜悯一切，于诸众生犹如父母，能度众生于生死河，普示众生一实之道，是则名为大般涅槃。

“善男子，大，名不可思议。若不可思议，一切众生所不能信，是则名为大般涅槃。唯佛菩

²⁰³ 大正藏：犍

萨之所见故，名大涅槃。以何因缘复名为大？以无量因缘然后乃得，故名为大。善男子，如世间人，以多因缘之所得者，则名为大。涅槃亦尔，以名²⁰⁴因缘之所得故，故名为大。云何复名为大涅槃？有大我故，名大涅槃。涅槃无我，大自在故，名为大我。

“云何名为大自在耶？有八自在则名为我。何等为八？

“一者，能示一身以为多身，身数大小犹如微尘，充满十方无量世界。如来之身实非微尘，以自在故现微尘身，如是自在，则为大我。

“二者，示一尘身满于三千大千世界。如来之身实不满于大千²⁰⁵世界，何以故？以无阂²⁰⁶故，直以自在故，满三千大千世界。如是自在，名为大我。

“三者，能以满此三千大千世界之身轻举飞空，过于二十恒河沙等诸佛世界而无障阂²⁰⁷。如来之身实无轻重，以自在故能为轻重。如是自在，名为大我。

“四者，以自在故而得自在。云何自在？如

²⁰⁴ 大正藏：多

²⁰⁵ 大正藏：三千大千；永乐北藏及龙藏：大千

²⁰⁶ 大正藏：碍

²⁰⁷ 大正藏：碍

来一心安住不动，所可示化无量形类各令有心。如来有时或造一事，而令众生各各成办。如来之身常住一土，而令他土一切悉见。如是自在，名为大我。

“五者，根自在故。云何名为根自在耶？如来一根亦能见色、闻声、嗅香、别味、觉触、知法，如来六根亦不见色、闻声、嗅香、别味、觉触、知法。以自在故，令根自在。如是自在，名为大我。

“六者，以自在故，得一切法，如来之心亦无得想。何以故？无所得故。若是有者，可名为得；实无所有，云何名得？若使如来计有得想，是则诸佛不得涅槃；以无得故，名得涅槃。以自在故，得一切法；得诸法故，名为大我。

“七者，说自在故。如来演说一偈之义，经无量劫，义亦不尽，所谓若戒、若定、若施、若慧。如来尔时都不生念：‘我说，彼听。’亦复不生一偈之想。世间之人，若四句²⁰⁸为偈，随世俗故，说名为偈。一切法性亦无有说，以自在故，如来演说；以演说故，名为大我。

“八者，如来遍满一切诸处，犹如虚空。虚

²⁰⁸ 大正藏：四句；永乐北藏及龙藏：若四句

空之性不可得见；如来亦尔，实不可见。以自在故，令一切见。如是自在，名为大我；如是大我，名大涅槃。

“以是义故，名大涅槃。

“复次，善男子，譬如宝藏，多诸珍异，种种具足，故名大藏。诸佛如来甚深奥藏亦复如是，多诸奇异，具足无缺，名大涅槃。

“复次，善男子，无边之物乃名为大。涅槃无边，是故名大。

“复次，善男子，有大乐故，名大涅槃。涅槃无乐，以四乐故，名大涅槃。何等为四？一者，断诸乐故。不断乐者，则名为苦；若有苦者，不名大乐。以断乐故，则无有苦；无苦无乐，乃名大乐。涅槃之性无苦无乐，是故，涅槃名为大乐。以是义故，名大涅槃。复次，善男子，乐有二种：一者，凡夫；二者，诸佛。凡夫之乐无常败坏，是故无乐；诸佛常乐，无有变异，故名大乐。复次，善男子，有三种受：一者，苦受；二者，乐受；三者，不苦不乐受。不苦不乐，是亦为苦；涅槃虽同不苦不乐，然名大乐，以大乐故，名大涅槃。

²⁰⁹ 大正藏：百

“二者，大寂静故，名为大乐。涅槃之性是大寂静，何以故？远离一切愤闹法故。以大寂静²¹⁰，名大涅槃。

“三者，一切知故，名为大乐。非一切知，不名大乐；诸佛如来一切知故，名为大乐。以大乐故，名大涅槃。

“四者，身不坏故，名为大乐。身若可坏，则不名乐；如来之身，金刚无坏，非烦恼身、无常之身，故名大乐。以大乐故，名大涅槃。

“善男子，世间名字，或有因缘，或无因缘。有因缘者，如舍利弗，母名舍利，因母立字，故名舍利弗。如摩铍罗道人，生摩铍罗国，因国立名，故名摩铍罗²¹¹。如目犍²¹²连，目犍连者，即是姓也，因姓立名，故名目犍连。如我生于瞿昙种姓，因姓立名，称为瞿昙。如毗舍佉道人，毗舍佉者，即是星名，因星为名，名毗舍佉。如有六指，因六指故，名六指人。如佛奴、天奴，因佛因天故，名佛奴、天奴。因湿生故，故名湿生。如因声故，名为迦迦罗、名究究罗、但但罗。如是等名是因缘名。

²¹⁰ 大正藏：故

²¹¹ 大正藏：摩铍罗道人；永乐北藏及龙藏：摩铍罗

²¹² 大正藏：犍

“无因缘者，如莲华、地、水、火、风、虚空。如曼陀婆，一名二实：一名殿堂，二名饮浆，堂不饮浆，亦复得名为曼陀婆。如萨婆车多，名为蛇盖，实非蛇盖。是名无因，强立名字。如坻罗婆夷，名为食油，实不食油，强为立名，名为食油。是名无因，强立名字。

“善男子，是大涅槃亦复如是，无有因缘，强为立名。善男子，譬如虚空，不因小空名为大也；涅槃亦尔，不因小相名大涅槃。善男子，譬如有法，不可称量，不可思议，故名为大；涅槃亦尔，不可称量，不可思议，故得名为大般涅槃。

“以纯净故，名大涅槃。云何纯净？净有四种。何等为四？

“一者，二十五有名为不净，能永断故，得名为净。净即涅槃，如是涅槃亦得名有，而是涅槃实非是有。诸佛如来随世俗故，说涅槃有。譬如世人，非父言父，非母言母，实非父母而言父母。涅槃亦尔，随世俗故，说言诸佛有大涅槃。

“二者，业清净故。一切凡夫业不清净，故无涅槃；诸佛如来业清净故，故名大净。以大净故，名大涅槃。

“三者，身清净故。身若无常，则名不净；

如来身常，故名大净。以大净故，名大涅槃。

“四者，心清净故。心若有漏，名曰不净；佛心无漏，故名大净。以大净故，名大涅槃。

“善男子，是名善男子、善女人修行如是大涅槃经具足成就初分功德。

大般涅槃经卷第二十一

● 结诵仪

补阙真言

(三遍)

南無喝啰怛那. 哆罗夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛拿. 吽. 泼抹拿. 娑婆诃.

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無大般涅槃经 (合掌三称)

发愿文

(一遍)

志心忏悔。我(某甲)与一切众生，从无始来，迷失真心，流转生死，六根罪障，无量无边，圆妙佛乘，无以开解，一切所愿，不得现前。我今读诵大般涅槃经，以此善根，发露黑恶，过、现、

未来三业所造无边重罪，皆得消灭，身心清净，惑障蠲除，福智庄严，净因增长，自他行愿速得圆成。愿诸如来常在说法，所有功德起随喜心，回向菩提，证常乐果。命终之日，正念现前，面见弥陀及诸圣众，一刹那顷，生莲华中。普愿众生，俱成佛道。

回向偈

(一遍)

诵经功德殊胜行 无边胜福皆回向
普愿沉溺诸有情 速往无量光佛刹
十方三世一切佛 一切菩萨摩訶萨
摩訶般若波罗蜜

回向偈

(一遍)

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

三皈依

(一遍)

自皈依佛，当愿众生，体解大道，发无上心。
自皈依法，当愿众生，深入经藏，智慧如海。自
皈依僧，当愿众生，统理大众，一切无碍，和南
圣众。



此咒置经书中可灭误跨之罪

南无护法韦驮尊天菩萨

